

清史綱要六集

榮玉讓讀



清史綱要

六

清史綱要卷之十三

光緒元年乙亥。正月辛丑。以英桂沈桂芬協辦大學士。

內閣侍讀學士廣安奏請飭廷臣會議。將嗣皇帝生有皇子會議。將嗣皇帝生有嗣。頒立鐵券。奉旨申飭。

戊午。帝行卽位禮於太和殿。

二月。盛京將軍都興阿卒。予諡清愨。

戊子。嘉順皇后崩。后爲尙書崇綺女。端莊謹默。動必以禮。正位中宮後。不得寵於慈禧皇太后。穆宗崩。慈禧皇太后訓責備至。后本已慟極。誓以身殉。遂不復食。至是崩。距穆宗之崩未百日也。諡曰孝哲毅皇后。

乙丑。命左宗棠爲欽差大臣。督辦新疆軍務。調景廉爲正白旗都統。命來京供職。調金順爲烏魯木齊都統。仍幫辦軍務。

四月壬辰。以沈葆楨爲兩江總督。兼辦理通商事務大臣。

五月壬子。命李瀚章往雲南查辦事件。以翁同爵兼署湖廣總督。
六月己巳。嚴禁廣東闖姓賭局。

以勦匪不力。革吉林將軍奕榕職。發往軍臺。

壬申。盛京將軍崇實奏。官軍平燬大東溝沙河子巨匪宋三好等巢穴。擒斬首要。
奉旨獎勵。

八月丁卯。英翰緣事革職。以劉坤一爲兩廣總督。

己巳。派郭嵩燾許鈴身充出使英國大臣。旋改派許鈴身充出使日本國大臣。而
以劉錫鴻爲駐英副使。又以何如璋代許鈴身使日本。

九月。越南匪徒黃崇英等滋事。廣西官軍出境會勦。生擒崇英。

十一月。劉嶽昭緣事革職。以劉長佑爲雲貴總督。

以陳蘭彬容闈爲出使美國兼日國祕國大臣。

十二月壬申。太后命翁同龢夏同善授帝讀。並命醇親王奕譞妥爲照料。

丁丑。吳棠卒。予諡勤惠。調李瀚章爲四川總督。

丁亥。命盛京將軍一缺。管理兵刑兩部。兼管奉天府府尹。照各省總督體例加銜。乙酉。添設臺北府知府等缺。從沈葆楨奏請也。

光緒二年丙子。正月己亥。因出關餉需緊迫。准左宗棠借洋款一千萬兩。

三月丁未。命景廉在軍機大臣上學習行走。

四月丙戌。賜曹鴻勳等三百二十四人進士及第出身有差。

五月乙未。大學士文祥卒。予諡文忠。

六月丁酉。命李鴻章爲全權大臣。卽赴煙臺。與英國使臣威妥瑪會商一切事務。初。英翻譯官馬嘉理。領總理各國事務衙門護照。往緬甸迎印度派來副將柏印等。旣遇。折還雲南。元年正月。行至騰越廳屬蠻允地方。被戕。英人指爲由署雲貴總督岑毓英指使。要挾多端。五月。派李瀚章入滇查辦。又派薛煥幫同辦理。旋瀚章等覆奏。謂馬嘉理由緬還滇。中隔野人土司地界。該處向多匪徒。與野人勾結。

劫掠行旅。當馬嘉理由滇赴緬時。由地方官妥爲護送。嗣由緬還滇。未經知會地方官。致匪徒伺隙。乘機刦殺。地方官並無調兵阻止。及指使戕害情事。英使威妥瑪與總理衙門王大臣會議。仍堅求將全案人證提京覆訊。王大臣等不允。遂於四月出京。詔李鴻章俟其到津時。與之互商。旣而威妥瑪至煙臺。未卽南下。詔鴻章赴煙臺與議。

七月辛酉。加上皇太后徽號。

雲南騰越練軍武弁蘇開先踞城叛。提督楊玉科等討平之。

甲申。李鴻章與威妥瑪定約於煙臺。鴻章至煙臺。至威妥瑪處會商。仍堅執事由岑毓英主使。要求將全案人證提京。適俄德美法等國使臣均在煙臺。公論亦以無確實憑據。請提京爲非。威妥瑪始允另議辦法。旋訂定會議條款三端。專款一條。第一端。昭雪滇案。第二端。駐京大臣及各口領事與中國官員往來之禮。及審辦案件交涉事宜。第三端。通商事務。又擬明年派員赴西藏探路。請給護照。列爲

專款。卽所稱爲煙臺條約也。旋奉旨允准。滇案遂結。

官軍收復烏魯木齊。新疆北路略定。初。左宗棠奉督辦新疆軍務之命。請以前署陝撫劉典爲幫辦。是年二月。劉典至蘭州。宗棠以甘肅善後事畀之。遂啟行。三月。駐軍肅州。四月。劉錦棠出嘉峪關。閏五月。次巴里坤。進駐古城。時馬人得踞烏魯木齊。白彥虎踞紅廟子。土回馬明踞古牧地。安集延遣纏回助之。六月。錦堂圍古牧。帕夏遣夷目阿托愛率騎來援。錦棠令余虎恩擊敗之。復以開花礮攻城。克之。守兵六千殲焉。師次烏垣。城東安夷土回纏頭皆宵遁。遂收復烏魯木齊。迪化州及王城。王城者。安得璘所築也。錦棠遣諸將分追至鹽池。阻戈壁而返。於是昌吉呼圖壁瑪納斯北城守兵皆棄城遁。帕夏所遣援兵至達板。亦不敢進。新疆北路略定。惟瑪納斯南城未克。至是。捷聞。劉錦棠等賞世職有差。

八月。定嚴禁栽種鴉粟例。

總理各國事務衙門奏定出使經費。奉旨允行。時因滇案已結。郭嵩燾等將出洋

赴任故也。

江蘇等省有邪教紙人剪辮。諭飭地方官查拿懲辦。

九月戊辰。調李瀚章爲湖廣總督。以丁寶楨爲四川總督。

收還英國商人所築上海達吳淞鐵路。初。英人擅築鐵路。沈葆楨等照會領事阻止。不允。由總理各國事務衙門商之威妥瑪。亦不允。詔李鴻章與威妥瑪妥商。乃以二十八萬五千兩買斷。行止聽中國自便。尋以不適用毀之。

金順等攻克瑪納斯南城。

十月癸丑。命李鴻藻景廉在總理各國事務衙門行走。

乙卯。召榮全來京。以金順爲伊犁將軍。英翰署烏魯木齊都統。

十二月戊子。李鴻章沈葆楨奏。請於閩廠前後學堂。選派學生三十名。分赴英法

兩國。學習製造駕駛。派遣員李鳳苞洋員日意格爲監督。奉旨允行。

光緒三年丁丑。正月癸亥。命載齡以吏部尙書協辦大學士。

二月壬寅。以訊辦餘杭民人葛品蓮身死一案。始終迴護。革浙江巡撫楊昌濬學政侍郎胡瑞瀾職。

三月癸酉。改派劉錫鴻充出使德國大臣。

官軍克吐魯番。自克瑪納斯南城後。大雪封山。諸軍不能踰嶺而南。帕夏與白彥虎乘暇移達板新城兩山間。以大通哈守之。大通哈猶言大總管也。帕夏次子海古拉。日役萬夫。造王府於吐魯番。自守托克遜。令白彥虎馬人得守吐魯番。帕夏居喀喇沙爾。爲中權以策應。至是冰解。劉錦棠自烏垣攻達板。破之。擒其酋愛伊德爾呼里。大小頭目無一脫者。張曜自哈密西進。趨吐魯番。下奇克騰木。攻闢展。劉錦棠遣將會之。進攻吐魯番。敗敵城外。馬人得及纏回萬餘降。遂克吐魯番。滿漢兩城。錦棠至托克遜。海古拉亦遁。三城皆下。

四月。帕夏自殺。自吐魯番既克。南八城門戶洞開。帕夏在庫爾勒。憂懼不知所爲。遂飲藥死。其子海古拉昇之西行。將達庫車。伯克胡里使使截之半途。殺海古拉。

帕夏名阿古柏。自稱畢調勒特汗。有子六人。長咬哥。卽伯里胡克。次卽海古拉。伯克胡里失寵於其父。旣殺海古拉。保南境而王。夷回推白彥虎守庫爾勒。彥虎自踞開都河西岸。覬入俄羅斯。

五月。賜王仁堪等三百二十九人進士及第出身有差。

六月。山西河南大旱。諭籌辦賑卹。

九月。官軍復新疆南路東四城。劉錦棠等自托克遜進兵。白彥虎先期走庫車。遂復喀喇沙爾庫爾勒。追至庫車。拔難回十萬人。進薄阿克蘇。守城回日出降。白彥虎走烏什。官軍追敗之。遂復烏什。一月中南疆東四城皆下。

十月。沈桂芬與日斯巴尼亞國使臣伊巴里議訂古巴華工條款十六條成。

光緒四年戊寅。二月乙酉。命王文韶在軍機大臣上學習行走。時李鴻藻丁母憂開缺也。

官軍克復南路西四城。新疆平。東四城旣復。伯克胡里踞喀什噶爾。而和闐伯克

呢牙斯圖反正。乘隙圍葉爾羌。遙應官軍。伯克胡里引兵擊敗之。遂踞和闐。而喀什噶爾滿漢兵弁守漢城者。使使迂官軍。安酋阿里達什保回城以攻漢城。伯克胡里棄和闐。走英吉沙爾。及三年冬。劉錦棠遣余虎恩等逼喀什城。伯克胡里白彥虎分路遁入俄羅斯。遂克喀什城。錦棠亦收復葉爾羌英吉沙爾。董福祥收復和闐。於是南疆西四城皆下。俘帕夏妻女及其幼子。並金相印父子。誅之。新疆平。至是捷聞。詔晉左宗棠二等侯爵。劉錦棠二等男爵。其餘諸將給獎有差。

四月戊寅。大學士英桂致仕。

五月庚戌。以載齡爲大學士。全慶以刑部尙書協辦大學士。

七月辛未。命王文韶周家楣在總理各國事務衙門行走。

乙亥。命曾紀澤充出使英國法國大臣。李鳳苞充出使德國大臣。

直隸永定河北六工漫口。

十月。安集延酋阿里達什自俄境入寇。糾纏回出奈曼。謀襲喀什噶爾。劉錦棠擊

清史紀要 卷十三
破之於玉都巴什。奈曼回目庫彌什設伏殺阿酋以獻。

十一月庚申。永定河漫口合龍。

光緒五年己卯。正月乙丑。停止捐輸。先將京捐局裁撤。各省限於五月悉數截止。安集延布魯特寇邊。劉錦棠破之於烏帕爾。

三月庚午。葬穆宗毅皇帝孝哲毅皇后於惠陵。

閏三月。主事吳可讀在薊州馬神橋三義廟內仰藥自殺。遺有密疏。請明降懿旨。預定將來大統之歸。略謂同治十三年十二月初五日懿旨。嗣後皇帝生有皇子。卽承繼大行皇帝爲嗣。將來大統之歸。未奉有明文。必歸之承繼之子。故請皇太后再行明白降一諭旨。將來大統仍歸承繼大行皇帝嗣子。疏入。皇太后命王大臣等議奏。旋諸臣覆奏。均以繼統似涉建儲。不敢參議。皇太后諭。皇帝將來誕生皇子。自能慎選元良。續承統緒。其繼大統者爲穆宗毅皇帝嗣子。皇帝必能善體此意。所有吳可讀原奏及王大臣等會議摺并諭旨。均另錄一分。存毓慶宮。

日本滅琉球。夷爲冲繩縣。

乙未。命前任福建巡撫丁日昌。以總督銜專駐南洋。會同沈葆楨等籌辦海防。節制沿海水師。旋又命充兼理各國事務大臣。

四月。從丁寶楨奏請。四川鹽務改辦官運商銷。初。寶楨任川督。以川省鹽務積弊甚深。改爲官運商銷。富廠竈戶。以爲不便。捏詞呈控。時尚書恩承侍郎童華查事。在川。遂據以入告。諭令寶楨確查具奏。寶楨奏稱。自上年開辦官運局後。本年奏銷核計。邊計各額引。已全數銷清。復帶銷積引一萬餘張。所收稅羨截釐及各雜款。至一百餘萬兩。商人從前一切無名使費。悉予刪除。民皆食賤。私梟潛蹤。實屬商民皆便。旋恩承等又以弊少利多爭奏。乃命戶部酌核具奏。至是。戶部覆奏。請飭寶楨妥籌辦理。因諭寶楨將官運商銷各事。悉心區畫。慎始圖終。不可動於浮言。亦不可操之過盛。蓋中旨頗利寶楨變法之溢收。又不欲顯斥阻撓者。故爲調停之詞。

己巳。山東署嶧縣知縣朱永康以誘殺委員高文保。定爲斬監候。先是朱永康強借商民銀兩。迨控經委員高文保查提管帳門丁。永康聽從伊姪朱寶森之言。誘殺文保。並給銀令寶森等逃逸。由尙書廣壽侍郎錢寶廉往勘訊明。至是定罪。五月癸巳。以崇綺爲熱河都統。時御史孔憲穀奏稱碩輔不宜遠離。請收回成命。不許。

乙未。命侍郎崇厚充出使俄國大臣。旋又命爲全權大臣。便宜行事。與俄政府議收還伊犁事。

六月。刑部奏議結四川東鄉縣濫殺案。初。四川署東鄉縣孫定揚。議派捐輸。每正銀一兩。加多五百文。人民反抗鬧糧。定揚遽誣爲叛逆。請兵勦洗。提督李有恆等遂妄殺寨民數百。經御史參劾。屢派大員查辦。至是。經恩承童華往勘訊明。由刑部議定。定揚有恆均斬監候。護理總督文格有痛加勦洗之札。與擬罪輕縱之丁寶楨等。均下部嚴議。

己未。翰林院侍講王先謙奏言路宜防流弊。奉旨嘉納。並諭近來頗有撓越陳奏。逞其私見。率意上陳。必至是非淆亂。漸開攻訐之端。甚至此唱彼和。議論紛騰。亦恐啟黨援之漸。於風俗人心大有關係。嗣後不得以雷同附和之詞。相率瀆陳。蓋自光緒元年以來。言路如寶廷張之洞張佩綸等。遇事敢言。朝廷亦頗嘉納之。至是。漸爲政府所厭。故因王先謙之奏而有是諭。旋御史李端棻參王先謙爲莠言亂政。朝旨斥其措詞過當。

七月丙子。許朝鮮與各國通商修約。命李鴻章作書告之。

八月壬子。致仕大學士單懋謙卒。予謚文恪。

九月癸巳。命麟書崇禮在總理各國事務衙門行走。

十月。廣西巡撫張樹聲奏擒獲李揚才。初。總兵李揚才前勦越南土匪有功。旋以未奏留廣西。缺望。上年秋間。在廣東原籍糾衆萬餘。出關踞越南者巖等處。詔命馮子材統師出關。至是。奏稱於龍登山搜獲揚才。

己巳致仕大學士英桂卒。予諡文勤。

十一月癸未。兩江總督沈葆楨卒。葆楨初守江西廣信府。與其妻林氏乞援卻敵。以此名聞天下。超擢巡撫。肅吏治。繩悍將。以籌餉用人。與曾國藩不合。乞假回籍。及督兩江。爲治嚴肅。江南風氣爲之一變。至是以積勞卒。予諡文肅。

甲申。調劉坤一爲兩江總督。以張樹聲爲兩廣總督。

十二月乙卯。前都察院左都御史崇厚革職拿問。交刑部治罪。崇厚奉使至俄。議收還伊犁事。俄人議以伊犁歸我。而償兵費二百八十萬。割伊犁西界數百里予俄。又割南界數百里。跨天山以隔南八城。并開口岸多處。其他損失權利處尤多。崇厚悉許之。與立約十八條。蓋印畫押。事聞。朝野駭然。廷臣交章論劾。詔撤崇厚歸國。以邵友濂暫署。至是。褫崇厚職。逮問。而令廷臣疆臣會議萬全之策。崇厚旋定爲斬監候。尋因曾紀澤奏請。卽行開釋。

光緒六年庚辰。正月辛未。命曾紀澤充出使俄國大臣。將崇厚所議收還伊犁條

約。再行商改。

丙子。李鴻藻起復。命仍在軍機大臣上及總理各國事務衙門行走。

庚寅。命劉錦棠幫辦新疆軍務。

二月己未。沈桂芬景廉與德使巴蘭德續訂條約六款善後章程九款成。

五月丁丑。賜黃思永等三百十三人進士及第出身有差。

六月甲辰。命李鴻章爲巴西議約全權大臣。

七月壬申。召左宗棠來京。陛見。以劉錦棠署理欽差大臣。張曜署幫辦。楊昌濬護理陝甘總督。

命曾國荃督辦山海關防務事宜。時因俄國議約不易轉圜。且聞有派兵來華封閉遼海。以爲挾制之信。故有是命。並命鮑超募勇駐紮天津山海關兩處適中之地。

庚辰。因軍機大臣辦事遲延。交該衙門議處。

八月。允李鴻章奏請。於陸路設立電線。

九月丙戌。大學士載齡因病乞休。允之。

十月庚戌。大學士寶鋆尙書李鴻藻。與美使安吉立等。續修條約四款。又續補修約四款成。

辛亥。命毛昶熙仍在總理各國事務衙門行走。

甲子。命醇親王奕譞寶鋆管理神機營事務。

十一月。劉銘傳奏請試辦鐵路。先由清江至京一帶興辦。詔李鴻章劉坤一議奏。旋張家驥劉錫鴻等奏阻。遂罷其議。

己巳。以全慶爲大學士。吏部尙書靈桂協辦大學士。

辛未。侍郎長敘護理山西巡撫布政使葆亨。以聖祖忌辰爲兒女嫁娶。交部嚴議。旋均革職。

光緒七年辛巳。正月乙丑。協辦大學士沈桂芬卒。予諡文定。

己丑曾紀澤與俄人定約於森彼得堡。紀澤抵俄京。議改崇厚之約。俄人以崇厚爲頭等全權大臣。而紀澤係二等公使。拒不與議。又欲遣其海部尙書到北京議約。駐京俄使亦以去留相要挾。並以兵船游奕中國海面。又增防邊戍卒。嗣經紀澤反覆辨論。往返磋商。始行定議。計改前約者七端。一、歸還伊犁南境。二、喀什噶爾界務。不據崇厚所定之界。三、塔爾巴哈台界務。照崇厚明誼所定兩界之間。酌中勘定。四、嘉峪關通商。仿照天津辦理。西安漢中兩路及漢口字樣均刪去。五、松花江行船。至伯都訥專條廢去。六、添設領事。僅於吐魯番添設一員。餘俟商務興旺時。再議添設。七、天山南北路貿易納稅事。改均不納稅爲暫不納稅。此外添償盧布四百萬圓。奏入。奉旨允准。收還伊犁事遂結。旋紀澤奏稱。此次俄人輕棄已得之權利。全由俄土戰後。財殫力竭。其君臣雅不欲再啓釁端。故得從容商改。和平了結。若議者以爲俄強大之國。尙不難遣一介之使。取已成之約而更改之。執此以例其餘。則中外交涉。更無難了之事。斯言一出。將來必有承其弊者。

壬辰。命大學士左宗棠在軍機大臣上行走。並在總理各國事務衙門行走。

二月癸巳。以曾國荃爲陝甘總督。

甲午。諭總理各國事務衙門。再向日本使臣妥商球案。先是。光緒五年。日本夷琉球爲沖繩縣。吾國與爭。不理。美前總統格蘭德從中排解。有割島分隸之說。日人又以前與吾國所訂約章。無一體均霑之條。與各西國獨異。欲援照加入。而以琉球南島歸吾。時中外大臣以俄事未結。南島枯瘠。議暫緩與議。今俄事已結。詔以劃分兩島於存球祀一層。未臻妥善。命與日使議結。旋日使突戶磯悻悻而去。命沿海各省嚴行戒備。

三月壬申。慈安皇太后崩。太后咸豐初年正位中宮。文宗好游宴。嘗婉言規諫。及垂簾聽政。召見大臣。呐呐如無語。悉以權讓慈禧太后。晚年尤謙讓未遑。事無鉅細。必待慈禧裁決。或委樞府主持。蓋益務韜晦云。年四十有五。諡曰孝貞顯皇后。命黎庶昌充出使日本國大臣。又命駐德使臣李鳳苞兼義奧荷三國使事。

四月恆訓丁寶楨奏勦辦雷波夷務肅清。四川雷波拋阿忽庚札等支夷匪。於上年九月出巢滋擾。經成都將軍恆訓四川總督丁寶楨派總兵李培榮等迭破堅巢。殄除悍黨。至是奏報肅清。

己未。命奕訢奕譞會同左宗棠李鴻章等。興修畿輔水利。

六月己未。命工部尙書李鴻藻協辦大學士。

七月己丑。以彭玉麟署兩江總督。玉麟疏辭。允之。

命鄭藻如充出使美國大臣。

八月庚午。李鴻章與巴西使臣喀拉多訂立條約十七款成。

癸未。實授劉錦棠爲欽差大臣。督辦新疆軍務。張曜幫辦軍務。

曾國荃因病乞休。允之。以譚鍾麟爲陝甘總督。

大學士全慶致仕。

九月乙未。命劉坤一開缺。以左宗棠爲兩江總督。

添設吉林璋春副都統。

十月癸酉。以靈桂爲大學士。文煜協辦大學士。

癸酉。以寶廷爲禮部右侍郎。寶廷以宗室翰林。遇事敢言。屢有陳奏。多見採擇。施行。至是擢任侍郎。疏辭不許。

十一月壬寅。以張之洞爲山西巡撫。之洞在翰林。屢上封奏。遇事敢言。至是以內閣學士簡任巡撫。

癸卯。安徽巡撫裕祿奏。已革提督李世忠怙惡不悛。兇暴恣肆。命卽正法。

光緒八年壬午。三月戊子。李鴻章賞假往湖北省視母病。以張樹聲署直隸總督。命陳蘭彬在總理各國事務衙門行走。

李鴻章丁母憂。命改爲署任。穿孝百日後。卽行回任。旋鴻章迭請終制。詔開缺駐紮天津。並署通商大臣。

李瀚章丁母憂。以涂宗瀛爲湖廣總督。

四月己巳。以曾國荃署兩廣總督。

朝鮮與美國立約。命道員馬建忠提督丁汝昌往蒞盟。旋英法二國先後與朝鮮立約。皆由建忠介之。

甲戌。致仕大學士全慶卒。予諡文恪。

五月壬辰。召劉長佑入覲。以岑毓英署雲貴總督。

七月。張樹聲奏誘獲朝鮮大院君李昰應。送保定安置。初。朝鮮王李熙。以支派入承正統。其本生父大院君李昰應。攬國權。及王年長。總攬朝綱。王妃閔氏用事。閔族執政。昰應失權怏怏。至是。兵士因缺餉譁變。奉以爲主。借清君側之名。殺大臣及辦外交者數人。並攻日本使館。殺日本人數人。以翦王羽翼。殺王妃。并囚國王。署直隸總督張樹聲聞報。遣提督丁汝昌道員馬建忠往。又遣提督吳長慶率陸軍至漢城。誘昰應至營。送歸天津。捕其黨百餘人。置之法。日本亦遣兵至。旋以償金開埠定約而還。昰應至天津。朝命免其治罪。安置保定。旋因國王懇請。於十一

年八月釋放歸國。長慶遂率所部留駐朝鮮。

十月庚辰。巴里坤領隊大臣沙克都林札布與俄國分界大臣在喀城會議。定喀什噶爾東北界約四條成。

十一月丁亥。王文韶開缺養親。命翁同龢在軍機大臣上行走。先是。太常寺卿周瑞清包攬雲南報銷。有賄託關說情事。爲御史陳啟泰等揭參。先後派王大臣查辦。有戶部需索賄銀。景廉王文韶均有賂遺鉅萬之風說。文韶在軍機。尤爲言路所指目。屢疏乞退。不許。至是以養親去職。雲南報銷案。旋於九年五月結案。周瑞清及御史李郁華。戶部主事孫家穆等。均發往軍臺。景廉王文韶等以失察交部議處。

戊子。命潘祖蔭在軍機大臣上行走。祖蔭旋於九年正月丁父憂開缺。

十一月癸巳。命張佩綸署理都察院左副都御史。佩綸以敢言稱。至是疏辭。不許。十二月。侍郎寶廷典試福建。途中買妾。自行奏請從重懲責。奉旨交部嚴議。旋議

革職。

光緒九年正月甲午。派曾紀澤辦理洋藥稅釐併徵事務。洋藥稅釐併徵。載在煙臺條約。因英使威妥瑪藉詞延宕。懸閣數年。至是英使還國。故命紀澤與英外部商辦。

己亥。命吳廷芬在總理各國事務衙門行走。

四月壬申。劉長佑因病開缺。以岑毓英爲雲貴總督。

賜陳冕等三百八人進士及第。出身有差。

五月壬寅。涂宗瀛因病開缺。以卞寶第署湖廣總督。

六月戊午。命李鴻章署直隸總督。張樹聲還兩廣總督任。曾國荃來京。陛見。鴻章疏辭。不許。

山東歷城等處黃河漫溢。

癸亥。諭禁在理教。京城直隸等處有在理教。以戒人吸煙飲酒爲名。御史李燧奏

請密拿。故命查禁。

七月。越南與法蘭西立新約十三條。初嘉慶間。越南舊阮王起自南圻。與新阮爭國。假法蘭西兵。以滅新阮。許給酬金。後止付其半。咸豐間。又因殺害教民。與法國構兵。同治元年。始立約講和。割南圻之嘉定邊和定祥。名爲外三省。以畀法人。十二年。又開兵衅。再訂和約。又割永隆安江河仙名爲內三省。以畀法。自是南圻全爲法踞。改嘉定爲西貢。成爲大埠。上年。法人欲實行紅河通商。紅河卽富良江。又名珥江。發源於雲南元江。爲北圻最大之江。有劉永福者。咸豐間聚衆於粵西。號黑旗。爲官軍所逼。走入越。越王招撫。授以三宣副提督。轄宣光興化山西三省。遂於保勝設卡抽稅。越王不能制。聽其自行收稅養兵。法人以爲有礙通商。必須驅除。并因和約內有代出貲勦匪之條。遂以兵船駛入東京。命河內總督讓故宮與之屯兵。總督不從。法人卽拘留之。是年三月。攻陷河內。九年二月。又攻陷南定。其夏。再陷河陽。其附近之廣安寧平二省。均爲所佔。時劉永福駐山西。屢與法人戰。

獲勝。而法人別以兵船攻東京順化河岸礮臺。陷之。適國王阮福時先於六月中病故。養子三人。立其長者。臣民廢之。推立故王之弟福昇。法人逼脅立約。權利盡失。旋福昇仰藥自殺。國人又立福時次養子福膺。年纔十二。受脅未能自振。

八月己巳。命彭玉麟往廣東。會同督撫辦理海防。時朝廷以越南久列藩封。暗助劉永福軍餉械。並命雲南巡撫唐炯駐紮山西。廣西巡撫徐延旭駐紮北寧。相機援助。法人因之屢有責言。初命李鴻章往廣東。督辦越南事宜。節制廣東廣西雲南三省防務。嗣又命在上海。與法使脫利古商辦。脫利古聲言將乘兵船入京。命鴻章還直督任。至是。脫利古又揚言至廣東。故命玉麟赴粵。而命南北洋妥籌防務。

九月庚辰。伊犁參贊大臣升泰等與俄國分界大臣佛里德。在塔城會議。定塔爾巴哈臺界七條成。自曾紀澤在俄改約後。兩國各派分界大臣。科布多幫辦大臣額福與俄國大臣撤斐索富。在阿拉克別克河口會議。科布多新界約。亦於八月

間竣事。

十一月辛巳。命張佩綸在總理各國事務衙門行走。

致仕大學士載齡卒。予諡文恪。

光緒十年甲申。正月丁亥。左宗棠因病請開總督缺。允之。

乙未。以曾國荃署兩江總督。

三月戊子。命奕訢寶鋆李鴻藻景廉翁同龢均退出軍機處。奕訢開去一切差使。並撤去恩加親王雙俸。寶鋆原品休致。李鴻藻景廉開去一切差使。降二級調用。翁同龢革職留任。奕訢等久居政府。頗委蛇保榮。屢爲言路所攻。至是因法越事急。朝廷將力圖振作。故將軍機大臣全數斥退。而命禮親王世鐸戶部尙書額勒和布。閩敬銘。刑部尙書張之萬。在軍機大臣上行走。工部左侍郎孫毓汶在軍機大臣上學習行走。

己丑。皇太后命軍機處遇有緊要事件。著會同醇親王奕譞商辦。

壬辰。廣西巡撫徐延旭雲南巡撫唐炯均革職逮問。先是延旭奉命出關。自駐諒山。而令提督黃桂蘭道員趙沃守越南之北寧。及法兵來攻。全軍潰退。北寧失守。詔徐延旭黃桂蘭趙沃均拿問。以潘鼎新代爲廣西巡撫。王德榜署廣西提督。桂蘭自殺。唐炯奉命出關。未奉諭旨。率行回省。致官兵退紮。山西失守。至是亦逮問。命岑毓英出關督師。

命奕劻管理總理各國事務衙門事務。周德潤在總理各國事務衙門行走。

己亥。命閻敬銘許庚身在總理各國事務衙門行走。

四月戊子。命許景澄充出使法德等國大臣。

戊午。命通政使吳大澂會辦北洋事宜。內閣學士陳寶琛會辦南洋事宜。翰林院侍講學士張佩綸會辦福建海疆事宜。

辛酉。李鴻章與法國水師總兵福祿諾議訂簡明條款五款於天津。法越一事。自七年以來。曾紀澤與法外部沙美拉古費理等。總理衙門及李鴻章與法使寶海

脫利古等往復辨論均無成議。自山西北寧失守。法勢益張。越南臣民望風降順。事勢益亟。本年三月。稅務司德璀璘力任調停。詔李鴻章通盤籌劃。酌定辦法。旋授爲全權大臣。至是。與福祿諾議訂五款。大略爲不侵犯中國南界。撤還北圻各防營。不索賠費。不傷礙中國威望體面。其餘詳細節目。俟該國別遣大臣前來會商。

壬申。張樹聲因病請開缺專治軍事。允之。以張之洞署兩廣總督。

五月甲申。巴里坤領隊大臣沙克都林札布與俄國分界大臣。在新瑪爾噶拉會議喀什噶爾西北界約六條成。

丁亥。以文煜爲大學士。

戊子。以額勒和布閻敬銘俱協辦大學士。

己丑。命張蔭桓在總理各國事務衙門學習行走。

辛卯。命中外大臣保薦人才。

丁酉。命中外大臣將職分應辦之事。盡心講求。切實辦理。

己亥。命左宗棠仍在軍機大臣上行走。時宗棠病痊來京。故有是命。並命毋庸常川入直。遇有緊要事件。預備傳問。並命管理神機營事務。

閏五月。命尙書福錕、崑岡、左都御史錫珍、侍郎徐用儀、內閣學士廖壽恆。並在總理各國事務衙門行走。

丁未。賞劉銘傳巡撫銜。督辦臺灣事務。

庚午。授曾國荃爲全權大臣。與法使巴德諾在上海會議詳細條約。並派陳寶琛會辦。初。福祿諾臨行。與李鴻章言。擬派隊巡查越境。鴻章不以上聞。奉旨申飭。時岑毓英駐保勝。潘鼎新駐諒山。朝命將駐紮北圻各軍調還關內。而法軍旋以巡邊爲名。攻犯諒山。潘鼎新等屢有捷奏。法提督孤拔率兵船來福州馬尾。有占踞地方爲質索賠兵費之說。法使巴德諾逗遛上海。詔國荃前往與議。旋國荃議許給撫卹銀五十萬兩。奉旨申飭。又以巴德諾照會無理已甚。諭一意主戰。

六月。法兵攻陷臺北基隆礮臺。又攻滬尾礮臺。劉銘傳擊卻之。
七月癸卯。法國使臣謝滿祿下旗出京。

乙巳。實授張之洞兩廣總督。

法國海軍攻燬福州馬尾各礮臺。並擊沈兵船多艘。轟燬船廠。初。法提督孤拔率兵船駛入馬尾。及和議決裂。遂開礮轟擊。吾兵船礮臺應戰均敗。法船旋即駛出口外。

己酉。下詔與法國宣戰。

丁巳。命周家楣吳廷芬崑岡周德潤張蔭桓陳蘭彬均無庸在總理各國事務衙門行走。時因法事決裂。言路頗咎辦理交涉諸人。故有是命。

辛酉。實授曾國荃兩江總督。

授左宗棠欽差大臣。督辦福建軍務。穆圖善楊昌濬幫辦軍務。

庚午。命何璟來京。旋革職。以楊昌濬爲閩浙總督。

八月癸酉命許庚身在軍機大臣上行走。鄧承修在總理各國事務衙門行走。丙子實授李鴻章直隸總督。

九月壬子以劉銘傳爲福建巡撫仍駐紮臺灣督辦防務。

甲子以額勒和布爲大學士以恩承協辦大學士。

十月壬申以皇太后五旬萬壽加恩近支王公在京大臣及封疆大臣等有差。

授劉錦棠爲甘肅新疆巡撫仍以欽差大臣督辦新疆事宜先是錦棠與陝甘總

督譚鍾麟奏設新疆郡縣謂左宗棠初議設新疆總督一員駐烏魯木齊新疆巡

撫一員駐阿克蘇將新疆另爲一省臣頗不以爲然新疆與甘肅形同唇齒若劃

爲兩省以二十餘州縣孤懸絕域勢難自存擬仿江蘇建置大略添設甘肅巡撫

一員以烏魯木齊爲省治設布政使一員以鎮迪道加按察使銜其伊犁將軍無

庸總統全疆移烏魯木齊提督駐喀什噶爾舊有之參贊辦事領隊各大臣酌量

裁撤疏入下吏部議行至是乃設甘肅新疆巡撫暨布政使等缺以錦棠等爲之。

裁撤烏魯木齊都統等缺。

丁酉。致仕大學士文煜卒。予諡文達。

朝鮮金玉均洪英植等作亂。殺其大臣閔台鎬趙寧夏等。召日本兵入宮。吾駐防提督吳兆有等助勤王兵。殺英植等。護朝鮮王入營。玉均等出奔日本。日本公使竹添進一郎焚使館。走仁川之濟物浦。朝命吳大澂續昌往查辦。旋日本遣井上馨至朝鮮。與其全權大臣議給賠款行成。

十一月乙丑。內閣學士徐致祥奏請罷開鐵路急修河工。詔以其信口詆訐。交部議處。旋部議降三級調用。左中允樊恭煦鴻臚寺卿鄧承修。相繼以因言獲咎。恐中外臣工致生猜測。爲言。均交部議處。降級留任。有差。

己巳。允彭玉麟等電奏。弛禁粵省闈姓濟餉。

十二月癸未。定唐炯徐延旭均斬監候。並議處保薦各大臣有差。炯延旭旋於十二年冬赦免。

戊辰。張佩綸何如璋均發往軍臺。馬江敗後。翰林院編修潘炳年等由都察院代奏。張佩綸等債事情形。給事中萬培因又奏佩綸等諱敗捏奏濫保徇私各節。詔左宗棠楊昌濬查辦。覆奏請交部議處。朝旨謂情重罰輕。佩綸先以濫保徐延旭等革職。至是。與何如璋均發往軍臺效力贖罪。

總兵吳安康率南洋兵船五艘援臺灣。於浙江海面遇法國兵船。自沈二船。餘退入鎮海口。法船遂攻鎮海口。守礮臺兵擊卻之。

光緒十一年乙酉正月。諒山失守。法兵進攻鎮南關。自和議破裂。潘鼎新屢有捷奏。至是。法兵猛攻諒山。官兵敗走。提督楊玉科等陣亡。惟滇粵各軍。尙力攻宣光未退。并敗法兵於臨洮。

乙丑。派李鴻章爲全權大臣。與日使商議事務。日本因上年吾駐朝鮮兵援王宮。迎朝王入營。以爲不便。特遣伊藤博文西鄉從道來議朝鮮事。旋立約三條。略謂兩國屯朝鮮兵。各盡撤歸。將來兩國如有派兵至朝鮮事。須互先行文知照。自是

吾駐朝鮮兵遂罷歸。

二月戊寅。革潘鼎新王德榜職。以提督蘇元春督辦廣西軍務。李秉衡署廣西巡撫。

馮子材等攻克文淵州。克復諒山。時鎮南關外各軍馮子材蘇元春王孝祺等屢敗法兵。克復諒山。

法兵陷澎湖。

壬辰。與法人議和。命越南臺灣等處定期停戰。

乙未。命卞寶第回湖南巡撫任。以裕祿署湖廣總督。

三月丙午。派李鴻章爲全權大臣。與法使辦理詳細條約事務。並派錫珍鄧承修會同商辦。

四月乙未。李鴻章等與法使巴特納在天津會訂越南新約十款。成。初。由總稅務司英人赫德力請仍照津約。與法人重議詳細條約。於天津簡明條約外。別無要

求。至是約成。法兵退出基隆澎湖。不索兵費。法兵永不得過北圻與中國邊界。中國亦不派兵前赴北圻。蓋是時中國兵於諒山獲勝。法人亦多主和。故和議得成。五月丁未。命李鴻章等籌議大治水師。增拓船廠。

甲戌。曾紀澤與英外部續訂煙臺條約專條十款成。

癸未。命孫毓汶沈秉成續昌在總理各國事務衙門行走。

召曾紀澤回京。以劉瑞芬充出使英國俄國大臣。

甲申。以張蔭桓充出使美國兼日國比國大臣。

庚寅。准彭玉麟回籍。先是。玉麟授兵部尙書。屢辭不許。至是以廣東防務解嚴。乞病回籍。許之。

辛卯。以和局既定。通諭中外。

壬辰。訓飭封疆大吏。如有仍蹈舊習瞻顧因循者。一經查出。輕則立予罷斥。重則分別治罪。

清史綱要 卷十三
御史吳岫編修梁鼎芬均交部嚴議。上年吳岫劾閻敬銘目爲漢奸。鼎芬劾李鴻章指爲可殺。至是。以其誣謗大臣。加以懲儆。並諭諸臣務當精白乃心。竭誠獻替。
七月辛丑。准左宗棠交卸差使。回籍調理。

丁巳。命周德潤往雲南。鄧承修往廣西。會同督撫。辦理中越勘界事宜。

八月丁丑。命李鴻章爲滇越邊界通商議約全權大臣。

乙酉。大學士左宗棠卒。贈太傅。予諡文襄。宗棠督辦福建軍務。時年七十有三。積勞過久。本已多病。聞命慷慨戒行。冒暑兼程抵閩。晝夜孜孜。以謀援臺。旋聞澎湖被陷。推胸頓足。至廢寢食。痰疾因之而起。至是。遂卒於閩。

九月庚子。改福建巡撫爲臺灣巡撫。駐紮臺灣。福建巡撫事由閩浙總督兼管。

辛丑。命醇親王奕譞總理海軍事務。沿海水師。悉歸節制調遣。並命奕劻李鴻章會同辦理。善慶曾紀澤幫同辦理。自和局既定。籌議海防善後事宜。至是。定議先從北洋精練水師一支。以爲之倡。此外分年次第興辦。命李鴻章專司其事。而設

海軍衙門於京師。

壬寅。大學士靈桂卒。予諡文恭。

十月癸未。命穆圖善爲欽差大臣。會同東三省將軍。辦理練兵事宜。

英滅緬甸。英國由印度派兵進據緬甸。中國以緬甸爲朝貢之邦。命駐英大臣曾紀澤與英外部會商。初議立君存祀。俾守十年一貢之例。不可得。乃議定由英駐緬大員。按期遣使。賫獻儀物。另行派員。先定分界。再籌通商。

十一月癸亥。以恩承閻敬銘爲大學士。福錕張之萬協辦大學士。

丙子。添設福建臺灣布政使。

辛巳。侍郎黃體芳奏請開去李鴻章會辦海軍差使。朝旨謂其迹近亂政。交部議處。旋降二級調用。

光緒十二年丙戌。三月癸丑。賞醇親王奕譞與其福晉坐杏黃橋。

乙卯。李鴻章與法使戈可當等在天津會議越南邊界通商章程十九款成。

五月癸巳。以張曜爲山東巡撫。張曜先以提督改授廣西巡撫。未至任。命挑濬京師護城河。又命查勘山東黃河。至是。調山東巡撫。

己亥。四川總督丁寶楨卒。予謚文誠。寶楨任川督。凡有興革。不避嫌怨。復都江堰。隄。還民田數十萬畝。裁減夫馬。民困大蘇。川鹽久敝。勦滇邊黔邊官運法。國家溢收百餘萬。

以劉秉璋爲四川總督。

壬寅。賜趙以炯等三百人進士及第。出身有差。

六月。依克唐阿吳大澂與俄員巴拉諾伏等勘定圖們江界牌。

壬申。皇太后諭。自本年冬至大祀圓丘爲始。皇帝親詣行禮。並於明年正月內。舉行親政典禮。尋醇親王奕譞禮親王世鐸等。累疏請皇帝親政。後太后再行訓政。數年許之。

乙酉。奕劻孫毓汶與英使歐格納會議緬甸條約五款成。

八月丙寅。命續修大清會典。

乙酉。御史朱一新奏遇災修省。預防宦寺流弊。先是四月間。醇親王奕譞巡閱北洋海口。皇太后派總管太監李蓮英隨往。至是。一新因順直水災。奏請修省。並以李蓮英隨奕譞巡閱。恐蹈唐代監軍覆轍爲言。奏入。太后怒。以奏中深宮或別有不得已之苦衷一語。命明白回奏。旋命以主事降補。

庚子。前湖南提督鮑超卒。予諡武襄。

丙子。命馮子材辦理瓊州客黎各匪。

乙卯。閻敬銘因病請於軍機處戶部兩項差使開去其一。允開去軍機大臣差使。十月丙寅。賞還奕訢親王雙俸。寶鋆以大學士致仕。賞食半俸。

戊寅。添設福建臺灣臺北道缺。

十一月丁未。命曾紀澤在總理各國事務衙門行走。

十二月丙戌。命李鴻章派員勘辦黑龍江漠河山地地方金礦。

光緒十三年丁亥正月癸丑。實授裕祿湖廣總督。

二月丁丑。命各省認真辦理保甲。

庚辰。總理海軍事務衙門奏請興造大沽至天津鐵路。允之。

辛巳。賞唐炯巡撫銜。命督辦雲南礦務。

五月己未。以洪鈞充出使俄德奧和國大臣。劉瑞芬充出使英法義比國大臣。李興銳充出使日本國大臣。興銳因病未行。以黎庶昌代之。

壬戌。奕劻孫毓汶與法使續議界務專約五款。商務專約十款成。

六月。前雲貴總督劉長佑卒。予諡武愼。長佑在官。以廉率下。所得祿賜。以卹戰時。接僚屬雖雜職微弁。必假詞色。統兵三十年。未嘗誅將佐。然諸將亦憚之。無敢犯約。

八月。黃河南岸鄭州下汛十堡河水漫溢。

九月戊寅。命薛允升李鴻藻往鄭州工次。尋命鴻藻督辦工程。

壬午。允戶部奏請。開鄭工捐例。

癸未。命李鶴年署理河東河道總督。已革前河督成孚留工効力。

十月庚子。奕劻孫毓汶與葡萄牙使議中葡條約五十四款及專款三條成。

十一月乙卯。命黑龍江將軍定安爲欽差大臣。會同東三省將軍辦理練兵事宜。時穆圖善已病故也。

戊午。帝奉皇太后至醇親王邸第視疾。嗣於壬申及十二月甲申甲辰。屢往視疾。光緒十四年戊子。正月辛未。添置甘肅新疆伊塔道缺。

癸酉。撤還駐藏大臣文碩。以長庚代之。並命幫辦大臣升泰迅速赴任。初。哲孟雄布魯克巴兩部。均爲西藏藩屬。乾隆間。哲孟雄爲廓爾喀所逼。過藏曲大河。達賴喇嘛將日納宗地方給與管理。及英人由印度窺藏。先收哲布兩部爲保護。藏人懼英之逼。并恨哲部之私結英人。遂欲攘奪哲布兩部之地。於哲部隆吐地方設立卡房。於是英人麻葛轟有帶兵入藏之說。總理各國事務衙門聞之。與駐京英

使定約。停止入藏。而飭令藏人速撤隆吐卡房。文碩狗藏人意。謂地爲藏地。撤無可撤。奉旨斥其迂謬。先行撤還。旋吐隆爲英兵所攻。藏兵自行退還。

二月癸未。以重修清漪園改爲頤和園工程告竣。諭擇於四月初十日奉皇太后臨幸駐蹕。

庚子。帝奉皇太后至醇親王邸視疾。

丁未。譚鍾麟因病乞休。允之。調楊昌濬爲陝甘總督。以卞寶第爲浙閩總督。

四月癸未。先是。命江西布政使李嘉樂署陝西布政使。李用清來京。另候簡用。因二人經督撫年終密考。均謂其性情褊急。故也。至是。大學士閻敬銘奏爭。謂二人爲近時藩司之最。巡撫德馨葉伯英劾去之。行圖自便。奏入。命將原摺擲還。並諭閻敬銘一偏之見。一似經其保薦。不進不止。他人遂不得更置一詞者。蓋二人均以清操先爲敬銘所保也。

六月己亥。皇太后諭明年二月歸政。

七月甲辰。准彭玉麟開兵部尙書缺。仍留巡閱長江水師差使。

丙辰。帝奉皇太后至醇親王邸視疾。

庚申。以吳大澂署河東河道總督。李鶴年成孚均發往軍臺。李鴻藻及河南巡撫倪文蔚均革職留任。鄭工自上年八月漫口後。口門寬至五百五十餘丈。先後由部撥工需銀九百萬兩。自歲杪開工。至本年夏間。奏報僅餘六占。不日可望合龍。乃六月下旬。西壩捆鑲船失事。阻礙不能進占。以致口門淘刷日深。秋汛已臨。不克堵合。時御史劉綸襄燕起烈奏參倪文蔚等糜帑誤工。故有是譴。

甲子。永定河堤工漫口。旋於九月奏報合龍。

丙寅。准大學士閻敬銘開缺。敬銘累疏乞病。不許。至是。乃准其開缺在京調理。

八月。西藏番兵與駐紮捻都納印兵啟釁。藏兵敗退。西藏自吐隆卡房被英兵攻燬後。屢思復仇。印度兵將哲孟雄全部收取。藏兵畏逼。遂相攻擊。藏兵萬餘。全行潰敗。咱利亞東朗熱等隘。同時失去。旋由駐藏大臣升泰派員赴邊。阻止英兵。並

清史紀事 卷十三
自至邊境。與英員保爾會商界務。

十月癸未。皇太后諭。副都統桂祥之女葉赫那拉氏立爲皇后。侍郎長敘之十五歲女他他拉氏封爲瑾嬪。十三歲女他他拉氏封爲珍嬪。

十一月壬戌。以丁汝昌爲北洋海軍提督。林泰曾爲左翼總兵。劉步蟾爲右翼總兵。時北洋海軍已成軍也。

十二月壬辰。太和門災。

丙申。鄭州河工合龍。

丁酉。因太和門災。命停止頤和園工程。

戊戌。命林維源幫辦全臺開墾撫番事宜。

光緒十五年己丑。正月辛丑。以張之萬爲大學士。徐桐協辦大學士。

辛酉。命各省將軍督撫議興辦鐵路事。先是。總理海軍衙門奏請接修天津至通州鐵路。御史余聯沅等奏阻。命海軍衙門會同軍機大臣妥議覆奏。仍執前說。故

又命各省將軍督撫各抒所見。迅速覆奏。

丁卯。御史屠仁守奏請皇太后歸政後。外省密摺。廷臣封奏。仍書皇太后聖鑒字樣。奏入。斥爲所見乖謬。命開去御史。交部議處。尋革職。永不敘用。

癸未。帝行大婚禮。冊立赫葉那拉氏爲皇后。

二月己卯。帝親政。

宣示醇親王奕譞豫杜妄論原奏。先是。光緒元年正月初八日。奕譞奏稱。歷代繼統之君。推崇本生父母者。以宋孝宗不改子稱秀王之封爲至當。慮皇帝親政後。僉壬倖進。援引治平嘉靖之說。肆其奸邪。豫具封章。請俟親政時。宣示天下。俾千秋萬載。勿再更張等語。至是。河東河道總督吳大澂奏請飭下廷臣會議醇親王稱號禮節。奉皇太后懿旨。茲當歸政伊始。吳大澂果有此奏。若不將醇親王原奏及時宣示。則後此邪說競進。妄希議禮梯榮。其患何堪設想。用特明白曉諭。將醇親王原奏發鈔。俾中外臣民知之。

壬辰。以大婚禮成。上皇太后徽號。

以薛福成充出使英法義比四國大臣。

三月丙午。以崔國因充出使美日祕國大臣。

庚申。以歸政禮成。上皇太后徽號。

戊辰。帝奉皇太后幸頤和園。閱視神機營水陸操。

四月庚子。賜張建勳等三百三人進士及第出身有差。

六月丙子。雲貴總督岑毓英卒。予諡襄勤。毓英在滇廿餘年。恩信感人深。父老兒

童。皆稱我老宮保云。

丁丑。以王文韶為雲貴總督。

七月甲寅。以裕祿為盛京將軍。

丙辰。調張之洞為湖廣總督。以李瀚章為兩廣總督。

八月甲戌。定興辦蘆溝橋至漢口鐵路。先是。各省將軍督撫覆奏鐵路事。多偏執

成見及不達時勢之言。惟劉銘傳欲由津沽開至京師。黃彭年欲先辦邊防漕路。而張之洞創議。自蘆溝橋起。徑行河南達於湖北之漢口鎮。尤爲詳盡。太后命海軍衙門詳細覆議。至是議定。先從兩頭試辦。南由漢口至信陽州。北由蘆溝橋至正定府。派李鴻章張之洞會同海軍衙門妥籌開辦。

癸未。安徽巡撫陳彝奏陳因利局章程。請通飭各省仿行。不許。

十月丁亥。因江浙兩省水災。命辦賑撫。

詹事府左庶子崇文因參劾大學士張之萬查無實據。革職。

壬辰。命各省藩臬陳奏事件。

丙辰。命禁革差徭諸弊。

丁巳。命各省將支應善後採辦轉運等局。刪減歸併。勒限三個月。開單奏報。

乙丑。命各省將軍督撫嚴緝盜賊。訪拿訟棍。

光緒十六年庚寅。正月戊辰。帝二旬萬壽。加恩獎敘懿親及中外大臣有差。

二月己丑。駐藏大臣升泰與英國總理印度大臣蘭士丹在孟加臘城會議。藏印條約八款成。升泰至藏邊後。勒令藏兵解散。總理各國事務衙門亦派稅務司赫政往幫同商議。尋英員約升泰至獨脊嶺會議。詔授升泰全權大臣。至印度畫押。至是約成。承認哲孟雄全歸英國管理。并定藏哲分界。以自布坦交界之支莫摯山起。至廓爾喀邊界止。分哲屬梯斯塔及近山南流諸小河。藏屬莫竹及近山北流諸小河。分水流之一帶山頂為界。其通商游牧事。則再行派員議訂。

閏二月己酉。命張蔭桓在總理各國事務衙門行走。

三月辛未。裁福建船政大臣。以總督兼管。

命劉銘傳幫辦海軍事務。時曾紀澤已病故也。

乙未。成都將軍岐元等奏。瞻對番目與巴宗喇嘛勾結野番滋事。派兵破寨擒渠。

邊境敕定。

四月壬寅。前兵部尚書彭玉麟卒。予諡剛直。玉麟剛介絕俗。遇部下若布衣昆弟。

而紀律極嚴。其巡閱長江水師也。劾罷營哨官百八十二人。江湖肅然。將佐畏之如神。地方有司亦望風震懾。民間諸不軌之徒。作奸犯科。愍不畏法者。輒相驚曰。彭宮保來。其威望有如此。

賜吳魯等三百二十六人進士及第出身有差。

五月乙亥。以長庚爲伊犁將軍。升泰爲駐藏大臣。

六月。直隸水災。

壬子。永定河堤漫口。

七月壬辰。以許景澄充出使俄國兼德國奧國和國大臣。李經方充出使日本國大臣。

八月乙丑。前陝甘總督楊岳斌卒。予諡勇愨。法越之覺。岳斌奉詔率師入閩。幫辦軍務。由泉州附漁艇渡臺灣。與巡撫劉銘傳籌戰守。和議成還籍。至是卒於家。

九月壬午。御史吳兆泰奏請停止頤和園工程。命交部嚴加議處。

清史綱要 卷十三
癸未。永定河漫口合龍。

十月丁未。兩江總督曾國荃卒。予諡忠襄。

以劉坤一爲兩江總督。

十一月乙酉。帝幸醇親王邸視疾。

丁酉。醇親王奕譞薨。帝詣邸成服行禮。奉皇太后懿旨。定稱號曰皇帝。本生考諡曰賢。子載灃卽日承襲王爵。載洵晉封不入八分鎮國公。載濤晉封不入八分輔國公。尋定皇帝持服期年。御縞素十一日。輟朝十一日。期年內御便殿時用素服。光緒十七年辛卯二月。王文韶奏四川會理州匪徒黃子榮等攻陷雲南富民祿勸二縣城。經官兵收復。勦平。

四月辛酉。帝奉皇太后幸頤和園。

安徽蕪湖江蘇丹陽湖北武穴鎮等處教堂。相繼被匪徒焚燬。命各督撫查拿首要各犯。訊明正法。并命出示曉諭居民。勿輕信浮言。妄生事端。

六月戊戌。命查拏哥老會。

七月甲申。山東巡撫張曜卒。予謚勤果。所部嵩武軍。命歸李鴻章節制調遣。

八月癸巳。命奕勛總理海軍事務。定安劉坤一幫辦海軍事務。

己亥。命刊發勸善要言。

致仕大學士寶鋆卒。予謚文靖。

十月。直隸邊外熱河等處金丹道教首楊悅春等作亂。竄擾蒙古。並陷朝陽等州縣。經奉直兩省官軍勦平。

乙亥。命崇禮洪鈞均在總理各國事務衙門行走。

十一月。俄羅斯侵帕米爾。英吉利入哪格爾及坎巨提。帕米爾者在甘肅新疆邊外。距疏勒州約一千四百里。屬布魯特回族。分爲大帕米爾小帕米爾蘇滿等十數區。咸同以來。俄人蠶食哈薩克浩罕各部。以設圖爾給斯坦斜米七河費爾干等省。浸及帕米爾。以通道印度。英人慕之。十六年。駐京英使以剖分帕地請。吾政

府恐敗俄人之爭。拒不許。至是俄兵遂侵入帕境。坎巨提在葱嶺東南。一名乾竺。與哪格爾隔水相望。本納貢於吾。又與英人立約。且交通於俄。其地西北通帕米爾。及俄兵侵帕。英人亦入哪格爾及坎巨提。以固印度北境。新疆巡撫陶模與英俄邊吏力爭。並請政府爭之。兩國外外部及駐京公使。旋議以帕地爲三國甌脫。英允。而俄不從。久之。不得要領。惟坎酋弑父虐民。並侵掠英人。由新撫奏請廢黜。而令其弟率餘民歸部。會英人立之。使仍守職貢。

十二月。貴州巡撫崧蕃奏下江廳苗人滋事。經官軍勦平。

匪首李國珍等在敖罕滋事。分掠東翁牛特各旗。踞烏丹城北大寺。爲直隸官軍勦平。

光緒十八年壬辰。正月庚辰。王文韶奏雲南鎮邊地方新附裸夷滋事。經官軍勦平。

三月。前大學士闔敬銘卒。予諡文介。敬銘在戶部。綜核名實。吏胥畏憚。既授大學

士忽失太后眷。屢忤旨。遭詰責。遂引疾去。

四月。賜劉福姚等三百七十七人進士及第。出身有差。

五月乙酉。卞寶第因病開缺。以譚鍾麟爲閩浙總督。

六月丁酉。以汪鳳藻充出使日本國大臣。

壬寅。派薛福成商辦滇緬界線商務。

閏六月。永定河堤工漫口。旋於九月奏報合龍。

庚辰。大學士恩承卒。予諡文愼。

七月。山東惠民等處堤埝漫溢。旋於九月奏報合龍。

壬子。革山西巡撫阿克達春職。先是。徐致祥參新授山西巡撫阿克達春貪黷。帶責其既有所聞。應卽隨時具奏。御史余聯沅又參阿克達春在安徽藩司任內。劣迹昭著。及不通文理。命劉坤一查辦。尋阿克達春召見。於詢問事件。奏對未明晰。命開缺。至是。劉坤一覆奏。所參皆實。遂革職。

戊申。定竊毀電報桿線罪。

八月甲申。以福錕爲大學士。麟書協辦大學士。

十月己巳。諭禁各省州縣濫用非刑。

十二月丙辰。以甲午年爲皇太后六旬萬壽。命禮親王世鐸等爲總辦萬壽慶典王大臣。會同各部辦理。

丙子。以楊儒充出使美國兼日國祕國大臣。

光緒十九年癸巳。五月。貴州巡撫崧蕃奏。普安直隸廳妖匪劉燕飛滋事。爲官軍勤平。

六月。永定河堤工漫口。旋於九月奏報合龍。

八月壬子。從出使大臣薛福成奏請。豁免海禁。

十月丙子。四川越舊營參將何長榮稅務司赫政。與英國政務司保爾。在大吉嶺議定藏印通商交涉游牧條約九款。又續款三條成。

十一月戊子。以龔照瑗充出使英國兼法義比國大臣。
十二月庚戌。許庚身卒。予諡恭慎。

辛亥。命徐用儀在軍機大臣上行走。

光緒二十年甲午。正月辛巳。以皇太后六旬萬壽。晉封妃嬪及宗室外藩王公。並加恩中外文武大臣有差。

乙未。先是。命各省將軍督撫副都統提鎮藩臬內。每省各酌派二三員來京慶祝皇太后萬壽。至是。派出盛京禮部侍郎文興等四十一人。命於十月初一日以前到京。恭候屆期隨同祝嘏。

丁酉。命許振禕會同李鴻章籌辦永定河工。振禕任河東河道總督數年。上年冬。召令來京。命會勘永定河工。至是。奏稱擬疏下游保近險。疏中洪。建減壩。治上游。各條。命分別籌辦。又命覆勘上游情形。尋以商議就緒。命還河督本任。

王文韶奏越南游匪竄擾邊境。攻撲都竜等處。經官軍勦退。

駐英大臣薛福成與英外部大臣勞俾伯力。續議滇緬條約二十款成。先是英初滅緬。曾紀澤與英外部議滇緬分界事。英人願以潞江以東地自雲南南界。抵暹羅北界。西濱潞江。東抵瀾滄江下游。屬中國。其間北有南掌國。南有撣人各種。聽中國處置。及紀澤解職。懸閣日久。英人漸不肯踐前言。至是。福成與英外部定約。僅得邊外龍川江中之大洲及蠻秀土司全地。與野人山之昔馬一地。又收還孟連江洪兩土司上邦之權而已。

二月戊午。駐美使臣楊儒與美外部續定華工條約六款成。己巳。諭各部院堂官逐日進署辦事。不准藉口兼差。稍涉因循。

三月己卯。湖南巡撫吳大澂奏設南洲直隸廳。下部議允之。

庚寅。江西巡撫德馨奏湖南鄱縣會匪鄧世恩等竄入江西。圍攻永寧縣城。爲官軍勦平。

四月甲寅。予大考翰詹一等之編修文廷式等升降有差。

辛未。賜張謇等二百八十一人進士及第出身有差。

王文韶奏雲南永北廳屬匪首丁洪潰等滋擾川滇邊境。爲官軍勦敗。生擒洪潰等。餘匪竄逸。

癸酉。李鴻章校閱海軍畢覆奏。命交部議敘。本年爲海軍會校之期。命李鴻章定安校閱。並周歷旅順等處。校閱沿海陸軍及各處臺塢等工事。至是覆奏。盛稱技藝純熟。行陣整齊。及臺塢等工一律堅固。

五月戊寅。朝鮮東學黨作亂。命直隸提督葉志超等馳赴朝鮮之忠清道助勦。東學黨者。創始於崔福成。刺取儒佛老諸說。起於慶尙道之慈仁縣。蔓延忠清全羅諸道。朝鮮賦重刑苛。民不聊生。黨人乘之。三月。創亂於全羅道之古阜縣。官兵討之。大敗。遂陷全州。將直搗王京。朝鮮政府大震。因中國駐朝委員袁世凱。乞援於李鴻章。鴻章奏派志超及總兵聶士成等率兵三營東援。屯牙山。因光緒十一年中日之約。有嗣後中國發兵前往朝鮮。必先咨照日本之語。使駐日公使汪鳳藻

告日本。日本覆書。不認朝鮮爲中國藩屬。且亦發重兵入朝京。是時東學黨聞中國兵至。已棄全州遁。中國以朝亂已平。約日本同撤兵。而日本要改朝鮮內政。中國以內政應歸其自主。卻之。

六月。日本兵入朝鮮王宮。幽朝王。使大院君主國事。流閔泳駿等。日本兵既入朝京。使臣大鳥圭介首責朝鮮獨立自主。勿認爲中國藩屬。復以改革內政五事要之。二十一日。圭介遂率兵入宮。殺衛兵。政令無鉅細。皆入日本人筭鑰。時吾駐朝委員袁世凱歸國。始爲戰備。

日本海軍擊沈吾運兵船高陞於豐島海面。并擄操江運船。駐牙山陸軍亦敗於成歡。時駐牙山兵因孤露無援。移屯公州及成歡。鴻章以和議不成。租英商高陞船載兵兩營援牙山。爲日人偵知。邀擊於海面。以水雷沈之。日本陸軍亦來犯成歡。駐兵吾兵迎擊。敗退。趨公州。

七月乙亥。與日本宣戰。布告中外。

己亥。命葉志超總統駐紮平壤諸軍。時馬玉昆統毅軍。左寶貴統奉軍。衛汝貴統淮軍之盛軍。豐伸阿統奉天之盛軍。皆由陸路渡鴨綠江。至平壤。葉志超公州之兵。亦繞王京北走達平壤。志超方以成歡之戰。鋪張戰績。遂拜總統之命。

壬寅。命敬信汪鳴鑾在總理各國事務衙門行走。

前甘肅新疆巡撫劉錦棠卒。予諡襄勤。

八月癸丑。從戶部奏請。命各省息借商款。以充軍需。

己未。上皇太后徽號。

日本陸軍攻平壤。吾駐朝各軍敗績。高州鎮總兵左寶貴等死之。平壤爲朝鮮舊京。城垣壯闊。縣延十餘里。吾軍共萬四千餘人。盡屯平壤。諸將日置酒高會。而軍士殘掠。役丁壯。漁婦女。朝民大失望。葉志超庸懦無布置。惟於城內外築壘爲自守計。及日兵來逼。諸將分畫守界。城之北面。左寶貴豐伸阿江自康守之。城之西面。葉志超守之。城之南面。迤西南隅。衛汝貴守之。城之東面。大同江東岸。馬玉昆

守之。復以左寶貴部分統聶桂林策應東南兩面。蓋以東南常敵衝。尤我兵力所注也。是時志超居城中調度。寶貴駐城北山頂。守玄武門。十三日。敵前鋒已抵大同江東岸。十四十五二日小戰。時前時卻。十六日。敵分枝猛進。馬玉昆力戰卻之。而玄武門已失守。蓋日兵分四大枝以包平壤。一枝由王京西北而抵平壤東南。此由大道來之敵。馬玉昆禦之於大同江東岸者也。一枝亦由王京西北至黃州。遂渡大同江。分道至江西甌山。以襲平壤西南面。一枝由王京東北。至江東縣渡大同江。以襲平壤北面。一枝由其本國來。自元山登岸。以截平壤西北大道。我軍歸路者也。四枝皆期十六日會平壤。而吾軍方墨守城垣。附郭而屯。惟知大同江東岸大道之敵。不虞其分路以議吾後也。十五日。敵踞城北山頂。左寶貴爭之。不能勝。諸將始慮後路將絕。志超欲冒圍北歸。寶貴不從而自扼玄武門山頂。十六日。敵分道來撲。外重三壘及內重之西一壘先陷。內重牡丹臺一壘。據全城形勝。吾軍以全力持之。而爲敵礮所專注。寶貴中礮殞。我軍奪氣。敵軍遂奪玄武門入。

城志超乃徧於城上豎白旗乞緩兵。是夜志超率諸將棄平壤北走。敵兵要於山隘。槍礮排轟。吾潰兵回旋不得出。死亡甚衆。平壤軍儲糧餉盡委之敵。過安州定州皆棄不守。朝命褫志超職。以宋慶總統諸軍。志超與衛汝貴旋均逮問。

丁汝昌率海軍與日本海軍戰於大東溝口外海面。敗績。先是六月杪。北洋海軍濟遠等艦護高陞運兵船赴牙山。於豐島西北遇日本兵艦。開戰。廣乙受重傷。自焚。閣海岸淺灘。濟遠遁歸威海。時丁汝昌率全軍在威海衛。堵塞口門。爲自守計。朝廷屢令巡弋洋面。汝昌屢報出巡未遇敵艦。而日艦亦時來窺威海。八月十三日。汝昌率全軍抵旅順。朝命以銘軍十二營濟師平壤。自鴨綠江登岸。凡商輪五艘爲運船。海軍全隊十二艘翼之。十七日抵大東溝。陸軍既登岸。十七日海軍將歸旅順。已刻與日本海軍全隊遇。吾戰艦十艘。分五隊。鎮遠定遠兩鐵甲艦爲第一隊。致遠靖遠爲第二隊。經遠來遠爲第三隊。濟遠廣甲爲第四隊。超勇揚威爲第五隊。汝昌居定遠督戰。平遠廣丙開戰後始來會。日本兵船十二艘。海軍中將

伊東祐亨爲司令官。旣交綏。揚威超勇先中彈火起。超勇卽沈沒。陣漸亂。致遠彈盡。管帶鄧世昌。粵人。素忠勇。以爲敵艦惟吉野速率最大。苟沈之。足以奪敵氣。遂開機向吉野衝突。吉野駛避。而致遠中其魚雷。遂炸沈。世昌死之。濟遠遁。撞傷揚威舵葉。沈之。廣甲亦逃。閣淺沈沒。靖遠經遠來遠不能支。亦駛出陳。敵船來追。經遠亦沈。時敵船萃於鎮定兩艦。定遠受重傷。日暮。敵船懼吾魚雷襲擊。解而南去。我軍亦歸旅順。二十四日。以臨陣先逃。斬濟遠管帶方伯謙。是役吾軍失船五。存者惟鎮遠。定遠來遠。靖遠濟遠及平遠廣甲七艘。皆受創甚。已不能軍。

壬戌。以李鴻章未能迅赴戎機。日久無功。命拔去三眼花翎。褫去黃馬褂。日本交涉初起。鴻章力主和議。謀撤牙山兵。未果。袁世凱葉志超請濟師。又不報。至是海陸軍皆失利。廷議皆咎鴻章。故有是譴。

丙寅。命四川提督宋慶幫辦北洋軍務。

丁卯。命御前侍衛公桂祥統帶馬步各營。至山海關一帶駐紮。

庚午。皇太后命六旬慶辰典禮。仍在宮中舉行。其頤和園受賀事宜。卽行停辦。先是。議定十月初十日。太后萬壽。援康熙乾隆間成例。踵事增華。帝率中外臣工。詣萬壽山行慶賀禮。自大內至頤和園。沿途所經。臣民報効。點綴景物。建設經壇。今因海陸軍屢敗。故命停辦。

九月甲戌。命恭親王奕訢管理總理各國事務衙門。並添派總理海軍事務。會同辦理軍務。

己亥。九連城及安東縣失守。先是。朝命宋慶率毅軍自旅順。劉盛休率銘軍自大連灣。依克唐阿率鎮邊等軍自黑龍江。皆赴東邊九連城。時平壤諸軍敗歸。渡鴨綠江始止。鴨綠江爲中國與朝鮮界。江以北吾之九連城。與江以南朝之義州。隔水相望。時吾軍駐鴨綠江以北者。宋慶依克唐阿劉盛休合平壤敗歸各軍。約七十餘營。除依克唐阿一軍外。皆秉宋慶節度。九連城南倚鴨綠。東枕靉河。河東有虎山。爲險塞。再東至安平河口。踰河爲蘇甸。爲長甸。其九連城以西爲安東縣。再

西則大東溝。爲鴨綠江口。宋慶駐九連城。聶士成守虎山。劉盛休守江岸。依克唐阿守安平河口。長甸各隘。豐伸阿聶桂林守安東諸城邑。二十二日。日本第一軍集義州。二十六日。其枝隊出東路鴨綠上游。從安平河口對岸徒涉而渡。依軍遽潰。奔寬甸。二十七日。其大隊從義州稍東與虎山相值對岸。架浮橋渡江。銘軍先潰。諸軍繼之。宋慶遣軍來爭。敵兵已畢渡。乃退保鳳凰城。二十八日。日人入踞九連城。別遣枝隊陷安東。豐伸阿聶桂林奔岫巖州。

庚子。日本兵由奉天金州花園港登岸。進逼旅順。日本第二軍由海道襲踞金州西之花園港。進抵皮子窩。其地距金州大連灣百餘里。距旅順二百餘里。詔宋慶回援旅順。

壬寅。以榮祿爲步軍統領。時榮祿爲西安將軍。以祝嘏入覲。特命福錕開步軍統領缺。以榮祿代之。

十月甲辰。日本兵陷鳳凰城。宋慶旣退保鳳凰城。以爲不可守。以退扼摩天嶺守。

遼陽東道入告。初一日棄城走。初二日日本兵遂入踞鳳凰城。初六日依克唐阿亦棄寬甸北走。

戊申。以畿輔大兵雲集。命恭親王奕訢督辦軍務。奕劻幫辦軍務。翁同龢李鴻章榮祿長麟會同商辦。

召劉坤一入覲。調張之洞署兩江總督。譚繼洵署湖廣總督。

己酉。命翁同龢李鴻藻剛毅爲軍機大臣。

癸丑。皇太后萬壽。帝率王公百官行慶賀禮。

日本兵陷金州。

甲寅。日本兵陷大連灣。

戊午。命王之春如俄。唁俄皇亞力山德之喪。並賀新皇尼可來第二卽位。

壬戌。命額勒和布張之萬均毋庸在軍機大臣上行走。

甲子。日本兵陷巖岫州。豐伸阿等奔析木城。

乙丑。命劉秉璋開缺。調譚鍾麟爲四川總督。以邊寶泉爲閩浙總督。

丁卯。日本兵陷旅順。日本兵踞大連灣十日。始向旅順。旅順船塢總辦龔照璦及諸將。不爲守禦計。惟艤漁舟海曲。備逃遁。二十一日。日兵踞南關嶺。二十五日。椅子山。案子山。松樹山等礮臺相繼不守。旅順遂陷。照璦及諸將雜亂軍中。或逃煙臺。或奔復州。照璦尋拏問。

庚午。聶士成復連山關。初。宋慶回援旅順。以聶士成守摩天嶺。屢卻日兵。至是。收復連山關。

壬申。太后命以瑾妃珍妃近來習尙浮華。屢有乞請。均降爲貴人。

十一月庚辰。命恭親王奕訢爲軍機大臣。

辛卯。命榮祿在總理各國事務衙門行走。

庚辰。日本兵陷析木城。辛巳。陷海城。

乙未。日本兵陷復州。

戊戌。命張蔭桓邵友濂往日本議和。先是十月中。蔭桓至天津。與李鴻章議和議事。旋遣稅務司德璀琳賚鴻章與日本總理大臣伊藤博文書往日本。日本卻之。鴻章乃請派員會議。至是。派蔭桓友濂往。由美國公使爲介。並聘美員福世德助訂和約。

十二月甲辰。命劉坤一爲欽差大臣。關內外防勦各軍。均歸節制。尋又命宋慶吳大澂幫辦軍務。

御史安維峻奏參李鴻章。詞連太監李連英。并謂皇太后遇事牽制。何以對祖宗天下。帝以其肆口妄言。恐開離間之端。命革職遣戍。

丙辰。日本兵陷蓋平。

癸亥。衛汝貴伏法。

丁卯。日本兵自山東落鳳岡登陸。陷榮城。逼威海。

庚午。命王文韶充幫辦北洋事務大臣。

清史綱要 卷之十三
辛巳。日本兵陷威海衛。日兵既踞榮城。吾兵禦之橋頭楓嶺。皆敗。威海南北幫礮臺相繼陷。日兵又旁襲文登寧海。皆陷之。

清史綱要卷之十四

光緒二十一年乙未正月乙酉日本兵陷劉公島。海軍全隊被擄。自大東溝海戰後。海軍留旅順修整。及旅順危。移駐威海。偶出巡弋。西不過登州。東不過成山。十一月杪。鎮遠誤觸礁受傷。管帶總兵林泰曾畏罪自殺。時日本海軍屢來威海口外窺伺。並礮擊登州府城。及其陸軍攻威海。又與之夾攻。威海南幫礮臺既陷。丁汝昌燬北幫各臺。至此陸地惟劉公島尙存。敵以南幫礮臺攻吾澳內諸艦。並以魚雷艇入口狙擊。定遠艦中雷鑿沈。來遠威遠靖遠等亦相繼沈。吾魚雷艇十二艘出口遁。全數被擄。島內兵譁躁。生路。諸洋員亦請姑許乞降。總兵劉步蟾自殺。汝昌乃與劉公島守將總兵張文宣均仰藥死。營務處道員牛昶炳召諸將及洋員議。作降草。署以海軍提督印。懸白旗詣日本軍降。於是海軍艦隊全數被擄。日本以康濟練船載汝昌諸櫬還煙臺。而縱水陸將士居民西渡。

辛卯。命李鴻章爲頭等全權大臣。與日本商議和約。張蔭桓邵友濂於正月初六

抵日本廣島。日本亦令伊藤博文陸奧宗光爲全權大臣。會蔭桓等議約。及互校勅書。因有請旨之語。伊藤等謂委任之權殊不完全。拒絕會議。送蔭桓等還國。而告美使謂中國誠派有位望大員。畀以全權。仍可隨時開議。意蓋指鴻章也。至是遂以鴻章爲全權大臣。仍以美員福世德從。而以王文韶署直隸總督。

己亥。吉林將軍恩澤奏伯都訥烏拉屬界教匪孟福山等。造言惑衆。推朱承修爲首。建立統兵元帥等名目。約期謀叛。經官軍勦平。

二月庚戌。日本兵陷營口。初。宋慶依克唐阿長順等屢攻海城不利。時朝廷以淮軍挫衄。欲倚用湘軍。魏光燾陳湜李光久等。皆令募軍北援。吳大澂以湖南巡撫。自請從軍。幫辦劉坤一軍。駐山海關。正月。出關抵田莊臺。所部皆逼海城而軍。二月初。屢次進攻。不利。初四日。敵兵自海城出犯。依克唐阿禦之不利。遂與長順以援遼陽爲名。率兵東去。牛莊勢益孤。敵兵來襲。光久光燾與戰皆敗。遂失守。大澂聞之。自田莊臺夜奔石山站。時宋慶戍營口。聞大澂走。亦棄營口。還田莊臺。乙卯。

田莊臺亦不守。自此遼陽錦州聲援梗阻矣。

東邊軍克復寬甸長甸。初，朝廷以畿疆危逼，調聶士成入援，以陳湜代守摩天嶺。時鳳凰城敵兵亦少，故鮮戰事。新授東邊道張錫鑾統定邊軍，逼寬甸，屢戰破敵。遂復寬甸長甸及香爐溝。敵兵阻河爲守，鑿水以東，無敵蹤矣。

己巳，日本兵陷澎湖。日本兵船攻澎湖媽祖宮，吾守礮臺兵擊卻之，旋由文良港登陸。守將知府朱上泮等走臺灣，遂失守。

庚午，李鴻章在日本馬關爲日本人槍傷。鴻章抵日本，以馬關春帆樓爲會議所。日本仍以伊藤博文陸奧宗光爲全權大臣。既互勅敕書，請先停戰。日人要以大沽天津山海關爲質，議不諧。遂請暫緩停戰。先議和款。二十八日，鴻章自會所歸。途次爲小山豐太郎槍彈傷額，創甚。警問播歐美，議甚沸。日人懼，乃允奉天直隸山東停戰，以二十五日爲限。凡訂約六款。

三月癸巳，李瀚章開缺，調譚鍾麟爲兩廣總督，以鹿傳霖爲四川總督。

甲午。李鴻章與日本全權大臣伊藤博文等在馬關議定和約十一款。另約三款。日本既允停戰。初七日。博文等以締和條款出示鴻章。限四日議覆。其最要者。一、朝鮮自主。二、奉天南邊各地臺灣澎湖各島均割隸日本。三、賠兵費庫平銀三百兆兩。其他尚有添開口岸七處。及要減子口半稅爲值百抽二。並將一切稅鈔豁除。及機器進口改造土貨等。十五日。鴻章覆文。允割奉天之安東寬甸鳳凰城巖岫及澎湖列島。賠庫平銀一萬萬兩。通商權利。一如各國成約。時鴻章創已愈。十六日。博文面交末次約稿。謂此次但允不允兩言而決。其稿視初次所擬。於割地內減去寬甸。而賠款減至二萬萬兩。要減子口稅及內地釐稅亦刪去。經數次會議辯論。日人堅不肯讓。僅減小節目數處。二十一日。遂定議。二十三日。互簽約稿。展停戰期二十一日。約於煙臺互換。鴻章乃歸天津。方鴻章之未東渡也。朝命三品以上官議和戰。迨割地賠款議定。朝野憂忿。臺灣臣民爭尤力。中外封章電奏阻款議凡百十上。朝意頗爲動。命王文韶劉坤一議決和戰。兩人覆奏頗依違。且

奏海嘯成災。和議遂定。

四月。俄法德三國阻日本割吾遼東地。日本遂以遼東各地歸吾。而增索兵費三千萬兩。三國憚日本之攘吾土地也。俄尤怒其據遼東。遂聯合以公文致日本外部抗議。而俄艦及法德艦分泊長崎遼海以示威。日本畏之。遂允以遼東歸吾。時和約尙未批准。互換。中國派伍廷芳聯芳爲換約使。十四日。與日使伊東已正治會於煙臺互換。又派李經方爲割臺灣使。與日使樺山資紀換約於日艦中。既而日本索贖遼東費一萬萬兩。至九月。乃由三國公斷。以三千萬兩償之。十月始撤兵。

乙卯。宣示與日本定約先後辦理緣由。

賜駱成驥等進士及第出身有差。

五月壬申。臺灣官民推唐景崧爲總統。宣告自立。先是。日本釁起。以布政使唐景崧署臺灣巡撫。調提督楊岐珍總兵劉永福渡臺。景崧自任守臺北。以永福守臺

南。及割臺之議起。臺人惶懼。主事邱逢甲首建自主議。登臺誓衆於新竹。出示告臺民。遂議立民主。開議院。製國旗。及和議既定。朝命景崧以下率兵民內渡。時臺人議。各國保護。并議抵押與法國。皆不成。景崧令官弁以五月初四日爲斷。欲去者聽。留者錄用。於是楊岐珍及道府各員均內渡。初一日。日本艦窺滬尾。初二日。景崧受臺灣總統印。文曰臺灣民主之章。國旗藍地黃虎文長方五幅。虎首內向。尾高首下。設內外部軍部等。初六日。日本兵由基隆北之澳底登陸。十二日。臺北城中兵勇互相殘殺。撫署火起。景崧微服出走。十五日。日本兵來收城。臺北亡。

癸酉。允定安開去練兵差使。定安先以東省練兵無成效革職。至是稱病請開去。暫留差使。允之。並命三省練兵事宜卽由三省將軍畫分辦理。

戊戌。與法國續議商務專條附章成。

甘肅回民作亂。甘肅河湟等處。漢回雜處。積不相能。回民又有新舊教之分。上年

冬。新舊教互鬪。繼乘東方有事。合而抗官。三月。撒拉回破積石關。圍循化城。至是。河州回閔伏英馬永琳相繼揭竿。陷漢民堡寨數十。攻狄道河州城。西寧回韓文秀劉四伏。大通回包良等。各擁衆數萬。四出焚掠。巴燕戎格碾伯各屬均響應。固原提督雷正綰河州鎮總兵湯彥和。既與回約和。復襲之以弋利。敗於起臺堡。正綰亦被圍於河州。

閏五月甲辰。大學士福錕乞休。允之。

癸丑。命吳大澂開缺。大澂兵敗。詔還湖南巡撫本任。至是命開缺。

命中外大臣保薦人材。

乙卯。日本公使林董覲見。

丁卯。命各省將軍督撫。就本省情形。將籌餉練兵恤商惠工各節。妥籌辦法。限一月內覆奏。

六月甲戌。孫毓汶請開缺。允之。毓汶與徐用儀在軍機。以主持和議。爲輿論所攻。

屢乞病假。至是。允其開缺。

庚辰。福建古田縣民殺英國教士數人。命嚴拿首要。並諭地方官實力保護教堂。御史鍾德祥以受贓革職遣戍。

乙酉。命徐用儀退出軍機處。並毋庸在總理各國事務衙門行走。

命翁同龢李鴻藻在總理各國事務衙門行走。

命錢應溥在軍機大臣上行走。

以麟書爲大學士。崑岡協辦大學士。

庚寅。命閩廣督撫派員赴南洋各島暨新舊金山。招徠僑商。承辦各省船械機器等局。

命喀什噶爾提督董福祥統甘軍赴甘肅。福祥先以祝嘏入京。東事起。統甘軍留防畿輔。至是。命還甘肅。勤辦回亂。

七月丁未。命李鴻章入閣辦事。調王文韶爲直隸總督。以崧蕃爲雲貴總督。

甲寅。楊昌濬、雷正綰均下部議。革湯彥和職。時平番回亦變。河西四郡文報不能達於東路。大通亦陷。循化圍雖解。彥和又敗於河州。詔以總督楊昌濬措置乖方。正綰受回愚弄。下部議。均議革職。改爲留任。

辛酉。江西巡撫德馨以貪婪荒縱革職。

八月。成都將軍恭壽等奏。瞻對番官對堆奪吉等滋事。

己卯。以四川省城本年五月間匪徒打毀教堂。省外各處又疊出教案。革前四川總督劉秉璋職。永不敘用。時各省教案迭起。外人要求懲辦官吏。故有是譴。

丁亥。調魏光燾爲陝西巡撫。旋命帶兵赴甘肅勦辦回亂。

癸巳。調裕祿爲福州將軍。以依克唐阿爲盛京將軍。

九月。日本取臺南府城。初。劉永福以幫辦臺灣軍務。守臺南。臺北旣陷。臺南僻在一隅。餉械已涸。不足守。於是鎮道以下及守中路之臺紳邱逢甲、林朝棟等相繼內渡。臺南土匪滋擾。紳士相率之旗後迎永福。並上總統印章。永福不受。仍稱幫

辦入府城議防守。五月以後。日本時以兵船窺安平等口。而陸軍先踞新竹。永福所部及團民拒戰。互有勝負。七月初。彰化失守。至是。餉械皆竭。饑軍悉潰。土匪蜂起。引敵臺南。府城遂陷。永福登德國商船內渡。臺南亡。

癸卯。命吳廷芬在總理各國事務衙門行走。

十月辛未。命楊昌濬開缺回籍。以陶模署陝甘總督。昌濬先已革職。至是。命回籍。而以新疆巡撫陶模署理。並命酌帶營旗入關。先清西路。先是。甘回有循白彥虎。故事。西竄新疆之議。陶模增兵哈密。並派總兵趙有正進駐肅州。提督牛允誠助守安西玉門。時關內回遣人出關煽動。九月。綏來縣回民托昌等謀變。省城回亦謀響應。均卽撲滅。旋署甘肅提督張永清兵敗於水泉堡。乃命趙有正進駐甘州。又命哈密肅州守將扼要守望。使甘回不得偷渡漠北。

甲申。侍郎汪鳴鑾長麟。以上年召對時屢次信口妄言。迹近離間。命均革職。永不敘用。是時太后與帝日益猜忌。凡廷臣奏對。抑揚其詞者。均蒙嚴譴。

丁亥。命胡燏棻督辦津蘆鐵路。

董福祥奏擊敗回匪。河州解圍。詔嘉獎。福祥行抵狄道。進至安定。知回衆均聚洮河兩岸。遂督兵渡河。轟破敵卡。又破三甲集堅卡。十五日。由狄道西山及康具崖兩路進。會於太子寺。回人望風奔潰。河州圍解。於是循化河州狄道三處肅清。斬閔伏英及撒拉回首馬古祿馬永琳等。福祥交部議敘。尋甘肅提督李培榮以援西寧失利革職。以福祥調補。仍總統甘軍。

十一月癸丑。命劉坤一張之洞各回兩江湖廣總督本任。

十二月。以明年四月俄皇加冕。派李鴻章爲正使。往賀。

光緒二十二年丙申。正月丁巳。總理各國事務衙門奏設官書局。命孫家鼐管理。先是。京師官紳設強學書局。講求時務。經御史楊崇伊奏請封禁。旋御史胡孚宸奏請將強學書局改歸官辦。至是。經總理各國事務衙門奏准。並派員管理。二月辛未。前臺灣巡撫一等男爵劉銘傳卒。予諡壯肅。

清史綱要 卷十四
魏光燾解西寧圍。斬韓文秀。光燾提師抵寧。先清東北關。遂蕩平北川。進攻哆巴。并解大通縣之圍。

壬申。設立郵政。從總理各國事務衙門奏請也。

癸酉。駐藏大臣奎煥以行止不檢撤還。以文海代之。

辛巳。翰林院侍讀學士文廷式革職永不敘用。驅逐回籍。先是廷式以編修大考一等第一超擢學士。至是。御史楊崇伊參其遇事生風。廣集同類。議論時政。並有與太監文海結爲兄弟情事。諭旨亦謂其召見時語多狂妄。遂予嚴譴。

己丑。戶部衙門災。

三月戊戌。大學士額勒和布致仕。

新疆官軍破回黨於北大通營。先是正月。趙有正攻甘州南四百餘里之俄博永安二城。下之。乘勝進攻北大通營。失利。及署總督陶模入關。至甘州。乃令潘效蘇等由扁都口進攻祁連山南諸堡。北大通營者。大通縣西北境也。地險而瘠。回族

踞之。屢擾驛道。破民堡。至是。回人棄城聚十大莊堡。無就撫意。效蘇等鑿戰浹旬。盡破各莊堡。

甘回竄青海。西寧回黨由水峽口竄青海。蒙古王公及新疆均告急。詔董福祥魏光燾分兵追剿。尋光燾因與福祥不合。詔還陝撫任。追剿青海之師亦爲陶模奏罷。

四月戊子。以崑岡爲大學士。榮祿協辦大學士。

五月壬寅。帝本生母醇親王福晉赫葉那拉氏薨。

丁巳。因山東曹單一帶刀匪肆擾。命江南山東督撫速卽剿除。

六月。鹿傳霖奏瞻對番官帶兵出巢。越界侵擾。命派員懾以兵威。妥籌進剿。瞻對土司上年與明正土司構兵。近又盤踞章谷土司官寨。不遵川督命令。並糾合朱窩土司及喇嘛寺之衆。抗拒官軍。旋經官軍將朱窩寨及瞻對新寨攻破。其酋仔仲則忠扎霸逃歸老寨據守。

壬午。命福州將軍裕祿兼充船政大臣。

永定河堤工漫口。

七月。新疆官軍殲回衆於羅布淖爾。擒劉四伏。西寧回黨既竄青海。狂走不少留。五月。由柴達木犯玉門安西南路。官軍迎擊。大破之。其酋劉四伏以數千騎由色爾騰海向羅布淖爾。餓斃強半。餘衆均降。四伏亦就擒於淖爾東南之和兒昂。

八月甲子。出使俄國大臣許景澄與華俄道勝銀行訂立東省鐵路公司合同十二條。初。李鴻章使俄。與俄訂密約。俄得在東三省境內建築鐵路。並借膠州灣爲軍港。蓋爲索還遼東之報酬也。至是。命景澄與訂合同。

戊辰。鹿傳霖奏辦理松潘番滋事一律肅清。予總兵夏毓秀等獎敘有差。

九月丙申。前大學士福錕卒。予諡文愼。

丙午。設立鐵路總公司。以盛宣懷爲督辦。

丁未。允大學士張之萬致仕。

督辦軍務處王大臣與俄國駐京使臣訂新約十二條成。

庚戌。命李鴻章在總理各國事務衙門行走。

十月丙寅。以甘肅回亂肅清。賞董福祥太子少保銜。並騎都尉世職。陶模補授陝甘總督。奎順。魏光燾等獎敘有差。

鹿傳霖奏攻克上中下三瞻。全境一律歸順。瞻對土司在裏塘巴塘之旁。爲四川入藏要路。本爲四川轄境。同治初。其酋工布朗結作亂。經西藏助兵勦平。遂以賞給西藏達賴喇嘛。自瞻酋對堆奪吉滋事。傳霖奏撤其番官。達賴不應。及用兵進討。有達賴派兵援瞻之謠。尋駐藏幫辦大臣訥欽徇達賴請。奏易番官赴瞻接任。詔從其請。傳霖以瞻對旣謀叛攻克。亟應收還其地。改土歸流。無須再派番官。奏請撤還。廷議恐達賴不肯甘心。不許。

庚辰。以羅豐祿充出使英國大臣。黃遵憲充出使德國大臣。伍廷芳充出使美國大臣。

清史綱要 卷十四
己丑。以徐桐爲大學士。李鴻藻協辦大學士。

十二月。派許景澄總辦黑龍江吉林交界鐵路公司事宜。

光緒二十三年丁酉。正月甲寅。中英續議緬甸條約十八款成。二十一年五月。與法國訂約。以前與英國所訂緬甸界約所得江洪界內之地與法。以爲索還遼東之報酬。英人聞之不悅。屢有責言。至是始訂約不再索問。而改劃界線。將工隆全地劃歸英國。并以那布喀相近三角地一段永租與英國。邊界益蹙。又添開梧州等口岸三處。

二月乙亥。命張蔭桓赴英國賀女皇卽位六十年慶典。

己卯。命崇禮許應騫在總理各國事務衙門行走。

三月甲辰。貝勒載澍忤皇太后旨。命革去貝勒。交宗人府重責八十板。於空室永遠圈禁。

丙辰。命呂海寰充出使德國大臣。

五月己亥。鹿傳霖奏德爾格忒小土司昂翁降白仁青母子恣行不義。業經擒獲收禁。老土司頭目人等獻地歸誠。擬改流設官。允之。

甲辰。前大學士張之萬卒。予諡文達。

七月庚寅。協辦大學士李鴻藻卒。鴻藻曾授穆宗讀。因援歷代優崇師傅禮。予諡文正。

丙申。命廖壽恆仍在總理各國事務衙門行走。

癸卯。提督林秀全因召見謝恩時起立不跪。命革職。

八月壬申。命翁同龢以戶部尙書協辦大學士。

九月戊子。命鹿傳霖開缺。以李秉衡爲四川總督。傳霖先以堅持瞻對改流。與朝旨不合。繼又用兵三巖披桑。及將瞻對所併德爾格忒土司改流。將軍恭壽駐藏大臣文海皆奏稱其獨斷獨行。恐有後患。朝旨亦責其辦理不善。命將德爾格忒土司父子釋放。毋庸改流。而奪傳霖職。以恭壽署川督。尋又命將三瞻地方仍給

達賴喇嘛。毋庸改土歸流。

庚寅。刑部尚書薛允升。以玉田縣買參差徭一案。牽涉其姪薛濟。不知迴避。降調。

十月癸亥。山東曹州鉅野縣天主堂德國教士二人被殺。

乙亥。德國海軍佔吾膠州灣礮臺。德國與俄法同索還遼東地。獨未得利益。至是。

藉口曹州教案。遽佔踞膠州灣礮臺。

十一月癸卯。因山東教案。解巡撫李秉衡任。以裕祿為四川總督。

庚戌。從剛毅徐桐奏請。命戶部及各省將軍督撫籌餉練兵。

十二月丙寅。命董福祥添練甘軍。分紮大慶關平陽府一帶。從督辦軍務大臣奏

請也。

戊寅。諭各省地方官實力保護教堂。

庚辰。諭各部院堂官務當常川進署辦事。

光緒二十四年戊戌。正月庚寅。設經濟特科。先是。貴州學政嚴修奏請設專科。至

是由總理各國事務衙門會同禮部議。先行特科。次行歲舉。特科約以六事。曰內政、外交、理財、經武、格物、考工。由三品以上京官及督撫學政各舉所知。咨送總理衙門。會同禮部。奏請試以策論。名爲經濟特科。歲舉則每屆鄉試年分。由各省學政調取各學堂書院高等生。送鄉試分場專考。奏入允行。

戊戌。頒發昭信股票。詹事府右中允黃思永奏籌借華款。請造自強股票。命戶部速議。戶部議印造股票一百萬張。名曰昭信股票。以五釐行息。分二十年本利還訖。令京外王公將軍督撫及大小文武官員。均領票繳銀。以爲商民倡。奏入允行。

己酉。命開辦京師大學堂。

癸丑。命嗣後武科改試槍礮。

二月甲子。命廖壽恒在軍機大臣上學習行走。

戊辰。因山東曹州教案。與德國訂膠澳租界條約四款成。條約大意。膠澳租界以九十九年爲期。並得膠濟鐵路建築權。路旁百里內之鑛山。均許其開掘。

三月丙戌。開湖南岳州府福建三都澳兩處爲通商口岸。尋又開直隸秦皇島爲通商口岸。

丁亥。諭各省裁撤各局。又整頓保甲。嚴裁空糧。又勸辦常平社倉。皆從尙書剛毅奏請也。

己丑。與俄人訂旅順大連灣租借條約九款。德人旣租膠澳。俄人援例租借旅順大連灣。以爲西伯利亞鐵路通過東三省之尾閭。以二十五年爲期。凡鐵路所經。許俄國派兵保護。朝廷均許之。

閏三月丙辰。大學士麟書卒。予謚文恪。

癸亥。命福州將軍增祺兼充船政大臣。

戊寅。德國親王亨利覲見。

四月壬辰。恭親王奕訢卒。予謚曰忠。並命入祀賢良祠。並配饗太廟。

丁酉。許英人於廣東九龍地方關立租界。尋由李鴻章與英使訂立中英展拓香

港界址專條。

甲辰。以榮祿爲大學士。剛毅協辦大學士。

命各省府廳州縣將現有之大小書院。一律改爲兼習中學西學之學校。以省會爲高等學。郡城爲中等學。州縣爲小學。並命民間祠廟不在祀典者。一律改爲學堂。

乙巳。命各省督撫保舉使才。

下詔定國是。宣示中外。是時帝決意變法。故有是詔。

丁未。賜夏同龢等三百四十八人進士及第出身有差。

戊申。翰林院侍讀學士徐致靖保薦工部主事康有爲等。卽召見。旋命有爲在總理各國事務衙門行走。

己酉。命王文韶來京。以榮祿署直隸總督。

協辦大學士戶部尙書翁同龢罷。時帝發憤變法。稍攬政權。同龢在毓慶宮授帝

讀最久。又爲軍機大臣。亦鑒於世變。贊成變法。並薦康有爲才堪大用。爲太后所惡。遂命開缺回籍。

命二品以上大臣謝恩。陛見。並詣皇太后前謝恩。外官一體奏謝。

五月丁巳。以孫家鼐協辦大學士。

命王文韶爲戶部尙書。在軍機大臣上行走。並在總理各國事務衙門行走。實授榮祿直隸總督。

命自下科爲始。鄉會試及生童歲科各試向用四書文者。改試策論。

乙丑。與英國訂立租借威海衛專條。自俄借旅順大連。英人亦索租威海。期限亦如俄與旅大時。威海日兵已將退出。遂轉以予英。

丁卯。派孫家鼐管理大學堂事務。

賞舉人梁啟超六品銜。辦理譯書局事務。

壬申。御史文梯奏言官黨庇誣罔。牽涉御史宋伯魯楊深秀及主事康有爲等。帝

斥其難保。不受人唆使。不勝御史之任。命回原衙門行走。
癸酉。命神機等營改練洋操。

乙亥。命裕祿在軍機大臣上行走。

丙子。以奎俊爲四川總督。

因四川北廳廣西永安州湖北沙市均有教案。申諭各省地方官實力保護教堂。

六月癸未。從張之洞陳寶箴奏請。定鄉會試隨場去取之法。並推行於生童歲科考。又停止朝考。

己丑。命頒發張之洞所著勸學篇於各省。

癸巳。從李端棻奏請。命刪改各衙門則例。

甲子。申諭各省實力舉行保甲。

丁酉。命設鑛務鐵路總局於京師。派王文韶張蔭桓管理。

甲辰。申諭變法不得已之苦衷。命諸臣精白乃心。力除壅蔽。

命康有爲督辦上海官報。從孫家鼐奏請也。時有爲屢有陳奏。爲軍機大臣等所忌。故出之。

七月丙辰。命於京師設立農工商總局。派端方徐建寅吳懋鼎督理。

己未。諭擇於九月中奉皇太后至天津閱兵。

乙丑。命裁撤詹事府通政司光祿寺鴻臚寺太僕寺大理寺衙門。湖北廣東雲南三省巡撫並東河總督缺。其各省不辦運務之糧道。向無鹽場之鹽道。亦均裁撤。其餘京外應裁文武各缺。命大學士六部各省將軍督撫。分別詳議以聞。

庚午。禮部尙書懷塔布許應騏侍郎堃岫徐會澧溥頤曾廣漢。均以阻格主事王照條陳革職。王照以不畏強禦。賞給三品頂戴。以四品京堂候補。

辛未。命內閣候補侍讀楊銳。刑部候補主事劉光第。內閣候補中書林旭。江蘇候補知府譚嗣同。均賞加四品卿銜。在軍機章京上行走。時帝欲變法。而軍機大臣

不能輔佐。又無權驟易。故特擢四人。使參預新政事宜。

癸酉。命裕祿在總理各國事務衙門行走。

以昭信股票擾民。命卽停止。

命李鴻章敬信均毋庸在總理各國事務衙門行走。

乙亥。置三四五品卿。三四五六品學士各職。從徐致靖奏請也。

戊寅。諭以改行新法之意。布告天下。時守舊諸臣。謠謗紛紜。故復下此諭。命刊刻
謄黃。切實開導。

己卯。命各省藩臬道府。凡有條陳。自行專摺具奏。州縣等官。由督撫原封呈遞。士
民上書。由本省道府隨時代奏。

八月壬午。命直隸按察使袁世凱開缺。以侍郎候補。專辦練兵事務。

丁亥。帝有疾。皇太后復訓政。自四月以來。京師謠言。皆謂帝病重。然仍日日召見
臣工。未嘗有病。及革禮部六堂官。擢四京卿。守舊者愈側目。滿洲大臣及御史楊

清史綱要 卷十四
崇伊等。至天津與榮祿謀。請太后復訓政。甲申。崇伊等至頤和園。上封事於太后。至是。乃下詔稱帝病不能視事。太后復訓政。同日。下詔捕康有爲。有爲先已出京。梁啟超亦出走。

革御史宋伯魯職。永不敘用。

己丑。太后臨朝訓政。置帝於南海之瀛臺。

庚寅。侍郎張蔭桓、徐致靖、御史楊深秀、京卿楊銳、林旭、譚嗣同、劉光第均下獄。

辛卯。以帝疾。命中外保薦精通醫理之人。先是內廷徧布帝病重之謠。至是。又有徵醫之命。

命徐用儀在總理各國事務衙門行走。

命詹事府等衙門照常設立。毋庸裁併。又禁止士民上書言事。廢官報局。停止各省改設學校。

甲午。命榮祿在軍機大臣上行走。授裕祿直隸總督。北洋各軍仍歸榮祿節制。以

裕祿爲幫辦。太后訓政。卽召榮祿入京。而以袁世凱護理直督。至是。乃令留京。而仍綰北洋各軍。

殺楊深秀。楊銳。林旭。譚嗣同。劉光第。及康有爲之弟康廣仁。深秀等旣下獄。刑部請派大臣會訊。太后命毋庸訊鞫。卽行處斬。

乙未。命將張蔭桓發往新疆。嚴加管束。徐致靖。永遠監禁。

停止九月。至天津閱兵。

戊戌。命袁昶在總理各國事務衙門行走。

庚子。革尙書李端棻職。發往新疆。數月來。與變法有關係諸臣。已誅逐殆盡。又下詔捕王照等。

以李盛鐸充出使日本大臣。

壬寅。革湖南巡撫陳寶箴職。永不敘用。寶箴在湘。銳意整頓。湘紳守舊者。頗多指摘。六月中。帝特詔褒美。至是。乃以曾保康。梁詒斥。

清史綱要 卷十四
乙巳。命各項考試仍用四書文試帖經文策問。並停經濟特科。

命禁止報館。嚴拏主筆。

廢農工商總局。

丁未。禁止結會。

命宋慶所部毅軍。董福祥所部甘軍。聶士成所部武毅軍。袁世凱所部新建陸軍。及北洋各軍均歸榮祿節制。

九月。先是。廣西土匪滋事。擾及梧州鬱林各屬。容縣興業陸川博白等縣均失守。至是督撫奏報一律肅清。

辛酉。邊寶泉卒。以許應騾爲閩浙總督。

戊辰。復設湖北廣東雲南三省巡撫並河道總督缺。

己巳。命許景澄在總理各國事務衙門行走。

丙子。命胡燏棻在總理各國事務衙門行走。尋又因其辦理鐵路事務較繁。命毋

庸行走。

庚辰。命李鴻章往山東。會同河東總督任道鎔。山東巡撫張汝梅。籌議山東黃河工程。

十月丙戌。命張翼督辦直隸全省及熱河鑛務。

辛丑。奪前協辦大學士軍機大臣翁同龢職。並交地方官嚴加管束。時榮祿剛毅等憾同龢不已。遂以甲午日本之役主戰主和。及密保康有爲爲辭。奪職管束。並奪前湖南巡撫吳大澂職。同龢旋病卒於家。

甲辰。江西廣豐縣副貢生楊恭宸。以投書教堂潛謀不軌伏法。賞舉發教士劉在鐸三品頂戴。

榮祿奏請分聶士成董福祥宋慶袁世凱所部爲武衛前後左右四軍。另募中軍萬人。許之。旋派喀什噶爾提督張俊爲武衛軍翼長。

乙巳。派胡燏棻督辦天津至鎮江鐵路。以張翼爲幫辦。

十一月庚戌。總理各國事務衙門奏分別鐵路緩急次第。蘆漢粵漢要幹及寧滬蘇浙浦信廣九等近幹要枝。均由總公司盛宣懷承辦。津鎮及山海關內外。責成胡燏棻辦理。太原至柳林。由山西商務局承辦。廣西龍州。由蘇元春承辦。此外已與各國定有成議。及近幹要路地不過百里。款不出百萬。不在停辦之列。外凡華洋各商請辦各枝路。此時概不准行。奏入。允之。

癸丑。命桂春在總理各國事務衙門行走。

甲寅。命趙舒翹聯元在總理各國事務衙門行走。

命啟秀在軍機大臣上行走。

庚午。命裕庚在總理各國事務衙門行走。

辛未。命各直省將軍督撫均兼總理各國事務衙門大臣。

十二月乙酉。新授湖北巡撫曾鈺奏請變通成例。命革職永不敘用。

戊戌。開廣西南寧府爲通商口岸。從總理各國事務衙門奏請也。

劉坤一等奏皖北渦陽等處土匪倡亂。經官軍擊散。生擒劉疙疸等。

光緒二十五年己亥。正月壬戌。榮祿等奏請將認領昭信股票銀兩作爲報效。允之。自慶親王奕劻以下及中外文武大小各官。均獎敘有差。仍諭各省紳商士民認繳之款。照原議按年計利。如期還本。

二月辛巳。以毓賢爲山東巡撫。

山東沂州民教啟衅。德人遣兵踞沂州。尋退出。

三月乙卯。命葉祖珪薩鎮冰爲海軍統領。

壬申。調增祺爲盛京將軍。

乙亥。王文韶許景澄與俄使議立勘分旅順大連灣租界專條八款成。

四月己丑。命剛毅前往江南一帶查辦事件。時政府急欲籌款練兵。議整頓關稅釐金鹽課等項。以江南地大物博。特派剛毅前往認真辦理。尋江南查辦事畢。又命往廣東籌款。剛毅所至搜括。共得數百萬兩。

五月丁未。以虎神營訓練五年。著有成效。予端郡王載漪等議敘有差。壬子。命吳廷芬在總理各國事務衙門行走。

甲寅。軍機大臣錢應溥以病免。

六月庚辰。命各直省將軍督撫實力整頓關稅釐金鹽課等項。將現在收數。無論爲公爲私。凡取諸商民者。一併和盤託出。一律澈底清查。裁去陋規中飽之數。酌量提歸公用。限三個月擬定奏報。並命將輪船招商局。電報局。及開平鑛務局。盈餘利息。酌提歸公。

八月壬午。太僕寺卿徐壽朋與朝鮮外部大臣在朝鮮都城訂立通商條約十五款成。

十月戊子。先是。法人助吾索還遼東。僅得滇邊隙地。及德佔膠澳。俄租旅大。遂因廣州附近有法國兵官爲游匪所戕。以兵艦入廣州灣。踞之。至是。命提督蘇元春與法國來使會議廣州灣租界約七條成。租約期限。一如俄之旅大。

丙申。命李鴻章爲商務大臣。前往通商各埠考察商務。

甲辰。命陶模來京。陞見。以魏光燾署陝甘總督。

十一月戊申。命毓賢來京。以袁世凱署山東巡撫。

辛酉。命譚鍾麟來京。以李鴻章署兩廣總督。

壬戌。懸賞購拏康有爲。梁啟超。

丙寅。命劉坤一來京。陞見。以鹿傳霖署兩江總督。

戊辰。協辦大學士孫家鼐以病免。

己巳。以王文韶協辦大學士。

十一月丁酉。立端郡王載漪之子溥儀爲皇子。繼承穆宗毅皇帝爲子。時后黨諸臣。日慙。太后廢立。載漪爲太后所信任。使掌虎神營。至是。遂立其子爲皇子。而命崇綺爲師傅。徐桐照料。是時廢立之舉。已喧傳中外。兩江總督劉坤一。致電信於榮祿。頗持異議。上海紳商。經元善等亦電爭。遂不果。尋命逮捕元善。元善走澳。

門以免。

光緒二十六年庚子。正月甲辰。以帝三旬壽誕。加恩王公大臣有差。

乙巳。張之洞等奏湖北稅釐鹽課三項無可裁提。請每年由總督以下捐銀報効。奉旨嚴行申飭。

戊午。命南洋閩浙廣東督撫。懸賞十萬兩。緝拏康有爲梁啟超。如有購閱所發報章者。亦一體嚴拏懲辦。

二月庚辰。各國公使夫人覲見皇太后於儀鑾殿。

丙戌。調毓賢爲山西巡撫。實授袁世凱山東巡撫。

四月丁酉。譚鍾麟開缺。實授李鴻章兩廣總督。

五月壬寅。因近畿一帶拳匪滋事。命嚴拏首要。解散脅從。義和拳爲白蓮教遺孽。

初起於山東之清平冠縣定陶等處。時毓賢爲山東巡撫。因沂州教案。由駐京各國公使訴諸政府。將其撤任。毓憾之。遂貽書朝貴。謂匪皆義民。且有神技可用。今

國勢日衰。由於民志未伸。若再殺拳民。無異自翦羽翼也。載漪剛毅等信之。因欲利用拳匪。排斥外人。地方官希旨。不敢言勦。匪勢益猖。及袁世凱代毓賢爲巡撫。一意主勦。其徒蔓延至直隸京津一帶。設壇建醮。誘惑鄉愚。其法以降神爲主。降神者。謂神附其體。卽精武藝。不畏槍礮。每有人入壇。有所謂大師兄者。爲之焚符誦咒。其宗旨以滅洋仇教爲名。凡洋人及教民。與爲洋人服役通洋語用洋貨者。分別等差。有十毛之目。一落其手。必殺無赦。遂借此舞刀跳躍。劫殺焚掠。又有紅燈照者。皆女子。與之相輔而行。時直隸總督派副將楊福同至涇水勦捕。被戕。匪又燬京津鐵路及車站。外人屢有責言。且將調兵入京。故有嚴拏首要之命。然諭旨仍以良莠錯出。及團民中多有游勇。會匪溷迹。其間爲辭。蓋終不以團民爲作亂之匪徒也。旋又派剛毅趙舒翹至近畿一帶曉諭。二人覆奏稱已解散。而實已招集入京。於是兵匪相合。圍攻各國公使館。焚掠街市。虐殺官商。朝貴爭相信從。其禍一發不可遏矣。

海史綱要 卷十四
甲寅。命載漪管理總理各國事務衙門。啟秀溥興那桐均在總理各國事務衙門大臣上行走。廖壽恆毋庸在總理各國事務衙門行走。

乙卯。甘軍戕日本使館書記官杉山彬於永定門外。日本兵將入京保護使館。杉山彬至車站迎候。途遇董福祥所部。遂被戕。

庚申。召巡閱長江水師大臣李秉衡來京。秉衡以教案罷職。命至奉天查辦事件。又命巡閱長江水師。至是。命帶兵入京。行至景州。所部陳澤霖助匪攻燬村落數處。

辛酉。各國聯軍踞大沽礮臺。時政府既助匪仇洋。京津鐵路已燬。英提督西摩爾統各國兵入京。至楊村。被阻折還。北京使館被圍。天津兵匪亦攻租界。各國兵遂奪踞大沽礮臺。

召各省兵入援。

壬戌。召李鴻章來京。以德壽兼署兩廣總督。

甲子。德國駐京公使克林德被戕。克林德將至總理衙門議事。行至東單牌樓。爲一滿兵所戕。

丁卯。下詔與各國宣戰。

命各省招集義和團助戰。

命莊親王載勛爲步軍統領。

戊辰。命載勛剛毅統率義和團。並派左右翼總兵英年載瀾會同辦理。

劉坤一張之洞與各國駐上海領事訂立東南保護約款九條。時有義和團南下。及官兵進攻上海租界之謠。外國人於租界多方設備。劉坤一等恐東南再起兵釁。全局益形糜爛。遂不奉中央命令。派盛宣懷及上海道余聯沅與各國領事申明各不相犯。並訂立約章。互相保衛。沿江各省。賴此以安。

六月丙戌。天津失守。自五月中旬後。天津拳匪焚殺教堂教民。攻擊租界。直隸總督裕祿奉拳匪頭目及紅燈照爲上賓。使共禦洋兵。遂兵匪聯合。與租界洋兵相

清史紀要卷十四
攻直隸提督聶士成先以勦匪落袋。被嚴旨申飭。至是力戰陣亡。及天津城陷。裕祿退至楊村。

命李鴻章調補直隸總督。

七月甲辰。殺吏部侍郎許景澄。太常寺卿袁昶。昶屢疏請勦拳匪。景澄召對時。亦有不可聽信妄言致觸列強之怒之語。爲載漪剛毅等所惡。李秉衡亦奏參二人。擅改電諭。至是遂以大不敬正法。時又殺張蔭桓於戍所。

戊申。命榮祿派兵護送各國公使往天津。自德使被戕後。兵匪聯合。圍攻使館益急。荷奧兩使館及道勝銀行先後被燬。各國兵及教民堅守英日等使館。時李鴻章劉坤一及駐外各公使等屢請保護使館。諭旨亦命派兵保護。並饋蔬果食物。而兵匪仍環攻不已。至是命榮祿派兵護送出京。各國公使不應。

癸丑。授李鴻章爲全權大臣。命電商各國。先行停戰。

福建浦城縣土匪滋事。陷浙江江山常山二縣。旋被官軍擊敗。

楊村失守。直隸總督裕祿死之。聯軍踞天津後。屢得北京使館乞援之信。遂大舉分路進攻。先據北倉。馬玉昆禦之楊村。敗退。裕祿受傷死於蔡村。

丙辰。殺尙書徐用儀。立山內閣學士聯元。時聯軍已逼京師。而匪燄轉熾。凡所欲殺。朝廷無不從之。既殺用儀等。將盡殺不肯附和諸人。會聯軍入京。遂不果行。

丁巳。聯軍至通州。李秉衡死之。秉衡至京。命幫辦武衛軍。至是。所部夏辛酉張春發等軍潰。秉衡自殺。

庚申。各國聯軍入京。太后挈帝出奔宣化。京師兵匪久攻使館及教堂未下。而聯軍已至。俄日兵由東直齊化二門先入。英兵亦由水門入使館。遂佔正陽永定兩門。是日黎明。太后挈帝出德勝門。隨行者。惟皇后大阿哥及載漪奕劻等數人。壬戌。至懷來縣。軍機大臣及其他王大臣始有至者。丙寅。至宣化。前黑龍江將軍延茂。祭酒王懿榮。熙元。侍讀寶豐。崇壽。翰林院庶吉士壽富等。均於城破時死之。徐桐亦自縊。榮祿崇綺至保定。崇綺卽自殺。

下詔罪己。並宣布將巡幸太原。命部院堂司各官分班速赴行在。又命各督撫整頓邊防。力固疆圉。

戊辰。下詔求直言。

庚午。准李鴻章便宜行事。將應辦事宜迅速辦理。

唐才常等謀起兵於湖北。事洩被誅。才常等結合江湖會黨。設自立會。散放富有票。議起自立軍。未發。於漢口地方被官兵破獲。才常等二十餘人均死。同黨先起兵於安徽之大通湖北之新堤者。亦先後敗死。黨人之在湖南者。多爲巡撫俞廉三捕斬。

八月辛未。太后挈帝自宣化府啟鑾。

命鹿傳霖在軍機大臣上行走。以尙書候補。傳霖由江蘇巡撫帶兵勤王。甫至近畿。京師已陷。遂赴行在。時剛毅在聞喜病死。以傳霖代爲軍機大臣。

壬申。命奕劻回京。會同李鴻章商辦一切事宜。

命毓賢開缺。以錫良爲山西巡撫。毓賢誘各國教士至撫署。屠殺甚慘。錫良以湖南布政使勤王赴行在。遂代毓賢爲山西巡撫。

調陶模爲兩廣總督。以魏光燾爲陝甘總督。岑春煊爲陝西巡撫。春煊以甘肅布政使率兵勤王。未到京。太后已挈帝出奔。遂率所部扈從。至是授陝撫。

甲戌。太后挈帝至山西大同府。

添派劉坤一張之洞會同商辦和議。尋又派榮祿會同辦理。並准其便宜行事。旋因各國不願接待。榮祿遂赴西安行在。

俄兵佔齊齊哈爾。黑龍江將軍壽山死之初。六月中。海蘭泡俄兵欲假道齊齊哈爾至哈爾濱保護鐵路。將軍壽山不許。旣俄兵又虐殺海蘭泡華商數千人。遂與愛琿副都統鳳翔開戰。二十九日。愛琿失守。七月十七日。俄兵佔北大嶺。鳳翔陣亡。八月初四。俄兵至齊齊哈爾。壽山自殺。

丙戌。太后挈帝至太原府駐蹕。

戊子。命於陝西省城酌備駐蹕之所。聯軍既入北京。德國派瓦德西爲統帥。旋俄國首創撤兵。李鴻章等奏陳各國之意。屢請太后回京。不允。至是。定議行幸西安。閏八月辛丑。懲治縱容拳匪諸臣。莊親王載勛。怡親王溥靜。貝勒載瀛。載澐。均革去爵職。端郡王載漪。撤去一切差使。交宗人府嚴議。載瀾。英年。交該衙門嚴議。剛毅。趙舒。翹。交都察院吏部議處。

優卹被戕德國公使克林德。日本書記官杉山彬。

壬寅。命各督撫保薦人材。

乙巳。俄兵佔營口及遼陽。旋入盛京。將軍增祺避至義州。尋命還盛京。時吉林亦爲俄佔。東三省全失。

丙午。聯軍佔山海關。

丁未。太后挈帝自太原啟鑾。幸西安。

丙辰。聯軍佔北塘礮臺。

己未。授奕劻爲全權大臣。會同李鴻章妥商和議。劉坤一張之洞會商辦理。

壬戌。聯軍至保定。殺布政使廷雍等。

乙丑。太后挈帝至潼關駐蹕。

壬申。太后挈帝至西安駐蹕。

庚寅。加重懲治縱庇拳匪諸臣。載漪革爵。與載勛溥靜載澧同交宗人府圈禁。載濂革爵。載瀾英年降調。趙舒翹革職留任。毓賢革職發往極邊充當苦差。時外人以懲治肇禍諸臣爲太輕。奕劻等屢請加重處分。故復有此旨。

十月丙午。張之洞奏開武昌北門外爲商埠。允之。

庚戌。命董福祥革職留任。帶兵還甘肅。時外人堅索治福祥罪。朝廷因其帶兵。未敢加罪。僅命還甘肅原籍。

壬子。調崧蕃爲陝甘總督。魏光燾爲雲貴總督。

癸丑。以王文韶爲大學士。徐郃崇禮均協辦大學士。

癸亥。以山西陝西災區甚廣。開秦晉實官捐輸。

十一月甲戌。允奕劻李鴻章電奏和議大綱十二條。初。鴻章奉命自廣東北上。既至天津。閏月中。乃入京。時奕劻先已還京。遂與各國公使開議。各國堅請先懲罪魁。並請兩宮先行回京。奕劻等據以電奏。太后雖未允回京。而罪魁已允嚴懲。至是。乃開出大綱十二條。一。戕害德使一事。由中國派親王專使至德。代表皇帝慚悔之意。並於被害處樹立銘誌之碑。二。嚴懲肇禍諸人。其戕害陵虐各國人民之各城鎮。五年內不得舉行文武各考試。三。戕害日本書記生事。中國必須用優榮之典。以謝日本政府。四。污瀆發掘各國人民墳墓之處。建立碣碑。五。軍火及專爲製造軍火之材料。不准運入中國。六。中國允賠補各國人及爲外國執事之中國人。身家財產所受公私各虧。七。各國常駐兵隊。護衛使館。八。京師至海邊。須留出往來暢行通道。大沽等礮臺一律削平。九。由各國駐兵留守通道。十。張貼永禁軍民人等仇視諸國之諭旨。十一。修改通商行船各約。十二。改變總理各國事務衙

門。並各國駐使覲見皇帝禮節。末言以上各款。若非中國國家允從。足適各國之意。難許有撤退京畿一帶駐紮兵隊之望。奏入。照允。仍命設法磋商詳細節目。

庚辰。授楊儒爲全權大臣。與俄國商辦接收東三省事宜。自聯軍入京。俄國首倡撤兵。而一面佔踞東三省。又屢催訂約交還。由奕劻等電請派駐俄使臣楊儒在俄京商議。時盛京將軍增祺派周冕至旅順與俄擅立奉天交地暫約九條。奉旨責其荒謬。交部嚴議。俄人又藉口中俄有特別關係。欲另訂約章。種種要素。日本合英美力阻。遂從緩商辦。

十二月丁未。下詔變法。

庚戌。諭禁仇視外國官民。並嚴禁各省匪徒藉仇教爲名。糾衆立會。

壬子。命張百熙充頭等專使。往英國唁英君之喪。並賀新君卽位。

壬戌。加懲肇禍諸臣。載漪載瀾均發往新疆永遠監禁。載勛賜自盡。毓賢正法。英年趙舒翹斬監候。董福祥革職。剛毅追奪原官。徐桐李秉衡革職。撤銷卹典。

開復徐用儀立山許景澄聯元袁昶原官。尋又復張蔭桓原官。

癸亥。降諭宣示拳匪構亂朝廷一切委曲難言之苦衷。並命將五月二十四日以後七月二十日以前諭旨彙呈。將矯擅妄傳各旨提出消除。

光緒二十七年辛丑。正月己巳。歸綏道鄭文欽因戕害洋員周尼思。命正法。並革綏遠城將軍永德職。

庚午。加重懲治肇禍諸臣。載漪載瀾定爲斬監候。加恩發往極邊新疆永遠監禁。英年趙舒翹賜令自盡。啟秀徐承煜正法。時啟秀徐承煜在京。爲聯軍拘禁。由奕劻等照會各國交還行刑。

二月癸亥。命劉光才一軍退紮山西境內。聯軍既佔北京。分兵近畿各屬。勦捕拳匪。南至正定。北至張家口。東至山海關。均在聯軍權力範圍以內。亦屢與錫良升允等軍衝突。光才駐紮井陘。聯軍擬由獲鹿進攻。由全權大臣請旨撤退。聯軍仍進攻娘子關。尋即退去。

三月己巳。設立督辦政務處。派奕劻李鴻章榮祿崑岡王文韶鹿傳霖爲督辦政務大臣。劉坤一張之洞遙爲參預。

丁丑。降諭懲處各省不能實力保護教士教民之地方官。

四月甲辰。命瞿鴻禨在軍機大臣上學習行走。尋又命爲政務處大臣。

丙午。命銷燬各部署案卷。裁汰書吏。

允各國所索償款四百五十兆兩。四釐息。

壬子。復開經濟特科。

命各省清釐例行文籍。仿照部章。刪繁就簡。各衙門書吏差役。分別裁汰。裁革。不准假以事權。

癸丑。授醇親王載灃爲頭等專使大臣。赴德國。

甲寅。命整頓翰林院。課編檢以上各官以政治之學。

丙辰。以和局已定。諭擇於七月十九日由河南直隸一帶回京。

五月癸酉。命那桐爲專使大臣。往日本。

癸未。以蔡鈞充出使日本大臣。

甲申。命出使大臣訪察游學生。咨送回華。聽候考試錄用。

六月丙申。命許台身充出使朝鮮大臣。廕昌充出使德國大臣。

癸卯。改總理各國事務衙門爲外務部。派奕劻爲總理。王文韶爲會辦大臣。瞿鴻禨爲尙書。並授爲會辦大臣。徐壽朋聯芳爲左右侍郎。

七月甲子。諭改於八月二十四日啟蹕回京。

乙丑。命直省河運海運。自本年爲始。一律改徵折色。

丙寅。命世鐸開去軍機大臣差使。

丙子。命各省綠營防勇。限於本年內裁去十之二三。

丁丑。各國公約定議。命奕劻李鴻章卽行畫押。

己卯。命自明年爲始。鄉會試等均試策論。不准用八股文程式。

命停止武生童考試及武科鄉會試。

調羅豐祿爲出使俄國大臣。時楊儒與俄外部議約未成。因病請派員接替。故以豐祿代之。

戊子。全權大臣奕劻李鴻章與十一國駐京公使議訂和約十二款成。

壬辰。命各省籌建武備學堂。

命停止捐納實官。

癸巳。命各省將原有各營嚴行裁汰。精選若干營。分爲常備續備巡警等軍。

八月乙未。命各省所有書院。於省城改設大學堂。各府及直隸州改設中學堂。各州縣改設小學堂。並多設蒙養學堂。

戊戌。命各省選派學生出洋肄業。

壬子。派盛宣懷爲辦理工商稅事務大臣。議辦通商行船各條約。及改定進口稅則一切事宜。

癸丑。特頒諭旨。責成中外臣工。將應行變通興革諸事。力任其難。破除積習。以期補救時艱。並將劉坤一張之洞會奏整頓中法以行西法各條。隨時擇要舉辦。

丁巳。太后挈帝自西安啟鑾回京。

九月壬午。命王文韶瞿鴻禨督辦關內外京榆鐵路。仍以張翼會辦。

己丑。李鴻章卒。贈太傅。晉封一等侯爵。入祀賢良祠。予諡文忠。尋命於京師建立專祠。子李經述襲爵。

命王文韶署理全權大臣。袁世凱署理直隸總督。

十月甲午。太后挈帝至開封府。

丙申。以張德彝充出使英國大臣。

壬子。撤去溥儀大阿哥名號。

丙辰。太后挈帝自開封啟鑾。

戊戌。命明年會試展至癸卯年舉行。順天鄉試及會試。均借河南貢院舉行。

丁巳。定學堂選舉鼓勵章程。凡由學堂畢業考取合格者。給予貢生舉人進士等名稱。

庚申。賞奕劻親王雙俸。榮祿王文韶劉坤一張之洞袁世凱等雙眼花翎官銜有差。因議和及共保東南疆土有功也。

聯軍撤出京師。僅留保護使館兵。

十一月乙未。設外務部左右丞左右參議等缺。以瑞良等爲之。

庚寅。太后挈帝還京師。

壬辰。追贈珍妃貴妃位號。上年太后出奔時。命人將珍妃納入井中。至是以隨扈不及殉難宮中宣布。

十二月癸巳。派張百熙爲管學大臣。

甲午。派王文韶充督辦路鑛大臣。瞿鴻禨充會辦大臣。張翼幫同辦理。關內外鐵路改派袁世凱接收督辦。

壬寅。命袁世凱參預政務處。

乙巳。帝御乾清宮。各國使臣覲見。

甲寅。榮祿奏請開去各項重要差使。優詔不許。

授孫家鼐大學士。

乙卯。准滿漢通姻。

光緒二十八年壬寅。正月丁卯。派吳汝綸爲大學堂總教習。

癸酉。四川提督宋慶卒。晉封三等男。予諡忠勤。

丁丑。派呂海寰會同盛宣懷籌議商約事宜。

派張翼總辦路礦事宜。

戊寅。裁撤河東河道總督缺。

戊子。命將詹事府歸併翰林院。

二月癸巳。命各出使大臣查取各國通行律例。責成袁世凱劉坤一張之洞。慎選

熟悉中西律例者。保送來京。聽候簡派。開館編纂。

三月辛酉。奕劻王文韶與俄國駐京公使雷薩爾議訂交收東三省條約四款成。先是各國公約未定之際。俄人脅增祺及楊儒。議另訂交還東三省條約。要素甚苛。李鴻章將許之。劉坤一張之洞及東南士紳力爭。英日兩國亦以爲言。遂未畫押。至是公約既定。乃與訂約四款。其撤兵期限。畫押後六箇月。先撤盛京西南段。至遼河。再六箇月。撤退盛京其餘各段。並吉林省。再六箇月。撤退黑龍江省。

四月丙申。派沈家本伍廷芳。將一切現行律例。按照交涉情形。參酌各國法律。悉心考訂。修定呈覽。候旨頒行。

以善耆爲步軍統領。

五月癸亥。實授袁世凱直隸總督。

丙戌。兩廣總督陶模因病乞休。允之。以德壽署兩廣總督。陶模受代後卽卒。予諡勤肅。

六月乙未。以胡維德充出使俄國大臣。

丁酉。以孫寶琦充出使法國大臣。

辛亥。命張之洞充督辦通商大臣。

七月己未。奎俊開缺。以岑春煊署四川總督。時四川資陽等處土匪蠶起。焚燬教堂。奎俊不能制。故以春煊代之。尋春煊抵任。整頓吏治。嚴捕匪首。川亂悉平。

庚午。張百熙奏呈所議學堂章程。詔頒行各省。

丁丑。袁世凱奏各國聯軍交還天津。天津自聯軍佔踞後。設立都統衙門。治理地方。至是。世凱蒞任。照約接收。

甲申。命袁世凱督辦津鎮鐵路。先是。派許景澄張翼與德國德華銀行英國匯豐銀行訂立借款草合同。至是。因勘路已竣。改派世凱與議詳細合同。

八月辛卯。呂海寰盛宣懷與英使馬凱在上海續議通商行船條約十六款成。

戊戌。袁世凱奏將各項陋規一律酌改公費。命各省仿照辦理。

丁未。加貽穀理藩院尙書銜。命辦理山西邊外各蒙旗開墾事宜。

戊申。奕劻王文韶與俄使雷薩爾商定交還山海關鐵路條款七條成。

九月辛酉。命各省選擇學生。派往西洋各國。講求專門學業。

癸亥。劉坤一卒。追封一等男爵。晉贈太傅。予諡忠誠。

以張之洞署兩江總督。端方署湖廣總督。

盛宣懷與華俄銀行訂立正太鐵路借款合同簽押。

貴州巡撫鄧華熙奏粵邊游匪攻陷興義縣城。

癸酉。命各督撫仿照袁世凱所定警務章程辦理巡警。

壬午。命袁世凱充督辦商務大臣。與張之洞會同辦理。以伍廷芳爲會辦大臣。並

會議各國商約事宜。

十月丁亥。派汪大燮爲日本游學生總監督。

十一月戊午。命自明年會試爲始。凡授職修撰。編修。及改庶吉士。用部屬中書者。

皆令入京師大學堂分門肄業。

壬戌。調魏光燾爲兩江總督。以丁振鐸爲雲貴總督。

己巳。命袁世凱等收回電報局爲官辦。旋派袁世凱爲督辦大臣。吳重熹爲駐滬會辦大臣。

十二月癸巳。派溥倫爲美國散魯伊斯城博覽會赴會正監督。

光緒二十九年癸卯。正月丁卯。命榮慶會同張百熙管理大學堂事宜。

三月壬戌。許應騫開缺。以錫良爲閩浙總督。

乙丑。命盛宣懷隨同袁世凱等會議商約事宜。

己巳。大學士榮祿卒。贈太傅。追封一等男爵。予諡文忠。

庚午。命緩行印花稅。

命奕劻在軍機大臣上行走。

丙子。調岑春煊署兩廣總督。以錫良署四川總督。李興銳署閩浙總督。德壽爲漕

運總督。

庚辰。派奕劻瞿鴻禨會同戶部整頓財政。

命載振袁世凱伍廷芳先訂商律。俟商律編成。卽行開辦商務。

四月甲午。與葡萄牙增改條約九款成。命奕劻畫押。先是。光緒十三年春間。因議辦洋藥稅釐併徵。派稅務司登幹往葡國議立節畧四款。其第二款載明允葡國永駐管理澳門。旋葡使來京。意在展拓澳界。經外務部駁阻。遂停議勘界。先增改稅則各條。至是約成。

己酉。雲南箇舊地方人民因阻撓外國人修造鐵路。官軍往捕。遂揭竿起事。推周呈祥爲首。陷臨安府石屏州。聚衆萬餘人。旋派按察使劉春霖等率兵勦平。

庚子。以崇禮爲大學士。敬信協辦大學士。

五月癸亥。命侍郎鐵良會同袁世凱辦理京旗練兵事宜。

戊辰。外務部奏張之洞盛宣懷等所定滬寧鐵路籌借英款訂立詳細合同。請准

清史綱要 卷十四
如所議辦理。允之。

壬午。賜王壽彭等三百十五人進士及第出身有差。

閏五月甲申。命馮子材會同岑春煊辦理廣西軍務。子材尋病卒。予諡忠毅。

丙申。革廣西巡撫王之春提督蘇元春職。廣西匪亂數年。始於沿邊游匪。繼蔓延內地。提督蘇元春邊防各營。與匪鉤聯。根株盤互。元春袒護養癰。及之春爲巡撫。不知整頓吏治。以清亂源。惟一意主撫。以圖早報肅清。至是。爲岑春煊參奏。均奪職。以柯逢時爲廣西巡撫。旋又以蘇元春縱兵殃民。缺額扣餉。拏交刑部治罪。

六月壬戌。予考取經濟特科一等袁嘉穀等九名。二等馮善徵等十八名。升敘有差。

七月乙酉。以效忠守正。賞湖北游學日本學生王璟芳舉人。

辛卯。命鄭孝胥以四品京堂督辦廣西邊防事務。

大學士崑岡因病乞休。允之。

戊戌。設立商部。以載振爲尙書。伍廷芳、陳璧爲侍郎。並裁撤路鑛總局。歸併商部。
八月己巳。商約大臣呂海寰等與美國來使康格等續議通商行船條約十七款成。又與日本來使日置益等議通商行船條約十三款成。

壬申。以敬信爲大學士。裕德協辦大學士。

九月丙申。命王文韶開去會辦外務部大臣。調那桐爲外務部尙書。會辦大臣。
命榮慶爲軍機大臣。並充政務處大臣。

丁酉。命那桐會同奕劻、瞿鴻禨辦理戶部財政處事務。

戊戌。命孫家鼐、張百熙充政務處大臣。

十一月壬午。因開平煤鑛與英人交涉貽誤。革前辦鑛務侍郎張翼職。責令設法收回。

己丑。設立練兵處。命奕劻等管理。以徐世昌充練兵處提調。劉永慶充軍政司正使。段祺瑞充軍令司正使。王士珍充軍學司正使。

清史綱要 卷十四
丙午。頒布學堂章程。先是。命張之洞會同管學大臣。將學堂章程悉心釐訂。至是。議定進呈。命次第推行。

丁未。改管學大臣爲學務大臣。命孫家鼐充學務大臣。

十二月丙子。因日本與俄羅斯開戰。宣告局外中立。俄人在東三省既不遵約撤兵。本年反增兵重佔奉天等處。日本與交涉不諧。遂開戰。於是東三省爲日俄戰地。吾國僅保遼西。稱中立。

頒行商律中之公司律。

光緒三十年甲辰。正月癸未。御史蔣式瑗因奏稱奕劻有存放匯豐銀行私款。命回原衙門行走。

日本兵敗俄兵於鴨綠江。佔九連城鳳凰城。

四月。日本兵於奉天之大孤山上陸。佔金州。以困旅順。

五月癸卯。賜劉春霖等二百七十二人進士及第出身有差。

乙巳。裁撤粵海淮安兩關監督。由總督兼管。

六月。日本兵佔大石橋、營口、牛莊及析木城、海城等處。

七月癸未。命鐵良往江蘇等省查勘財政武備事宜。

戊戌。調魏光燾爲閩浙總督。以李興銳署兩江總督。

八月。日本兵敗俄兵於遼陽城外。遂佔遼陽。又敗俄兵於沙河。

九月癸未。大學士敬信因病乞休。允之。

庚子。李興銳卒。以周馥署兩江總督。

壬寅。以唐紹儀爲議約全權大臣。先是十六年。中英訂立藏印條約八款。十九年。復將通商游牧交涉三款。議訂九條。並續款三條。嗣因藏人爭執。久未照行。上年。英員榮赫鵬帶兵入藏。本年六月至拉薩。達賴喇嘛走庫倫。英人與番衆立約十款。朝廷以西藏爲吾屬地。力阻畫押。派唐紹儀由印入藏查辦。至是。命與英國所派全權大臣。將條約酌量改訂。

十月丁未。以裕德爲大學士。世續協辦大學士。

己酉。商約大臣呂海寰等與葡使白朗毅續定中葡商約二十款成。

十一月庚辰。裁雲南巡撫湖北巡撫兩缺。

辛巳。實授錫良四川總督。魏光燾閩浙總督。丁振鐸雲貴總督。

戊子。以俄國波羅的海艦隊東來。飭沿海各省戒嚴。

十二月壬戌。袁世凱奏請試辦直隸公債票。允之。

丙寅。改漕運總督爲江淮巡撫。先是。署兩江總督端方代奏。修撰張謇條陳。請於徐州建立行省。御史周樹模亦請裁漕運總督。均下政務處議。至是議覆。改漕運總督爲巡撫。仍駐清江。名爲江淮巡撫。江淮揚徐四府暨通海兩直隸州。全歸管。理。仍歸兩江總督兼轄。奏入。允行。

俄國旅順守將乞降於日本。日本自與俄國開戰後。海陸軍圍攻旅順。苦戰經年。未下。至是。乃以援絕出降。

光緒三十一年乙巳正月甲午。魏光燾開缺。以升允爲閩浙總督。

二月。日本兵敗俄兵。佔奉天省城。

三月。駐藏幫辦大臣鳳全爲巴塘番人所戕。先是。瞻對土司改流。泰寧寺喇嘛藉端煽亂。詔鳳全就近勤辦。及爲番人所戕。命提督馬維騏往勤。

丙子。派柯逢時管理八省土膏統捐事宜。先是。鐵良奏稱湖北湖南於宜昌設立總局。抽收土膏稅捐。繼又並江西安徽兩省合辦。較各省分辦之時。溢收甚鉅。兩廣蘇閩亦係雲貴川土行銷之地。若合八省爲一。收數必更可觀。事下財政處及戶部。至是。與各督撫商定。請將宜昌原設之局。改爲八省總局。而派逢時管理。

丁丑。調升允爲陝甘總督。崧蕃爲閩浙總督。

庚寅。裁撤江淮巡撫。改淮揚鎮總兵爲江北提督。江淮分省。江蘇京官爭言其治理不便。事下政務處。至是。奏請裁撤江淮巡撫。設江北提督。允之。以劉永慶爲江北提督。

癸巳。伍廷芳沈家本等奏請將律例內重刑凌遲梟首戮尸三項永遠刪除。凡死刑至斬決而止。允之。

四月丙午。以趙爾巽爲盛京將軍。

俄國波羅的海艦隊爲日本海軍殲滅於日本海。

五月己亥。大學士崇禮因病乞休。允之。

庚子。王文韶開去軍機大臣差使。命徐世昌在軍機大臣上學習行走。並充政務處大臣。

辛丑。命鐵良徐世昌會辦練兵事宜。

六月乙巳。命張之洞督辦粵漢鐵路。

甲寅。考試出洋學生。賞金邦平等進士舉人出身有差。自是每歲試留學生以爲常。

丙辰。命載澤戴鴻慈徐世昌端方分赴東西洋各國。考求一切政治。

己未。以世續爲大學士。那桐協辦大學士。

癸亥。裁廣東巡撫缺。

七月乙酉。續派紹英爲出洋考察政治大臣。

丁酉。命鐵良在軍機大臣上學習行走。並充政務處大臣。

壬寅。因各省工商抵制美約。命各督撫認真勸諭。美國定禁止華工苛例。東南各省提倡不用美貨。以爲抵制。美使以爲言。故有是命。

甲辰。停止鄉會試及各省歲科考試。

戊辰。載澤等將出洋考察。至正陽門車站。遇炸彈。載澤紹英均受微傷。遂改期行。己巳。錫良等奏官軍勤平巴塘番匪。獲戕害鳳全之喇嘛阿澤隆本郎吉等斬之。予提督馬維騏道員趙爾豐等獎敘有差。

日本與俄羅斯議和於美國之朴子茅斯成。

外務部與各國使臣改訂修濬黃浦河道條款成。

八月。收還粵漢鐵路合同於美京畫押。

九月庚辰。設巡警部。以徐世昌爲尙書。毓朗趙秉鈞爲侍郎。

派袁世凱鐵良爲秋操閱兵大臣。至河間閱操。

辛卯。以廣西全省肅清。予岑春煊太子少保銜。李經羲丁槐等獎敘有差。春煊自二十九年五月至廣東。卽帶兵赴廣西潯柳督師。時廣西游土各匪四起。句合南泗鎮色柳慶思潯太平恩順等屬。無地不匪。春煊遴選文武。分路勦辦。八月還廣東。旋鎮太泗色思南各路。漸告平靖。先後擒斬匪首黃五肥等數十人。三十年五月。柳州兵變。柳慶土匪又同時蠶起。春煊遣龍濟光王芝祥陸榮廷等分路攻勦。擒斬萬餘人。至是始告肅清。

戊戌。命尙其亨李盛鐸會同載澤戴鴻慈端方前往各國考察政治。徐世昌紹英遇炸彈後不果行。故改派尙李二人。

德人歸吾膠州海關。

十月丁未。命奕劻瞿鴻禨袁世凱爲全權大臣。與日本使臣小村壽太郎等開議滿洲條約。日本既與俄和。凡俄國在奉天南部權利。盡讓與日本。故小村來與吾國訂約。

辛酉。命政務處王大臣籌定立憲大綱。

乙丑。以陸徵祥充出使和蘭大臣。兼理海牙平和會事。

戊辰。諭各省嚴禁革命排滿之說。

設考察政治館。

十一月辛未。大學士裕德卒。予諡文愼。

己卯。設立學部。以榮慶爲尙書。熙瑛嚴修爲侍郎。並以國子監歸併學部。

乙未。奕劻等與日使訂中日新約成。

十二月己酉。崧蕃卒。以端方爲閩浙總督。

辛亥。以那桐爲大學士。榮慶協辦大學士。

光緒三十二年丙午。正月乙酉。賞給軍機處王大臣等養廉銀。

甲午。徐卮休致。以瞿鴻禨協辦大學士。

命善耆往蒙古查辦事件。

三月戊寅。從學部奏請。宣示教育宗旨。

癸未。命將綠營一律改爲巡警。從巡警部奏請也。

己丑。江西南昌縣法國教士王安之。邀知縣江召棠至天主堂議事。召棠咽喉被創。旋卒。人民聚衆毀法國教堂。戕王安之等。詔撤巡撫胡廷幹任。派梁敦彥偕法使館人員往查辦。尋以給撫卹賠償銀結案。

四月己亥。裁撤各省學政。改設提學使。司提學使。

頒行破產律。

辛丑。唐紹儀與英使薩道義訂藏印正約成。又命張蔭棠由印赴藏查辦事件。

癸丑。派鐵良充督辦稅務大臣。唐紹儀爲會辦大臣。

七月戊申。宣示預備立憲。命先將官制分別議定。俟數年後規模粗具。再行宣布立憲實行期限。時載澤等考查各國政治回國。條陳仿行憲政。派載灃等公同閱看。決定先從官制等入手預備。故有是詔。

己酉。調端方爲兩江總督。以周馥爲閩浙總督。

派載澤等編纂官制。並命端方等派員來京。隨同參議。又派奕劻孫家鼐瞿鴻禨總司核定。

戊午。以岑春煊爲雲貴總督。調周馥爲兩廣總督。丁振鐸爲閩浙總督。

八月。諭禁鴉片。定限十年以內。將洋土藥之害。一律革除淨盡。

以趙爾豐爲督辦川滇邊務大臣。

九月。陸軍會操於河南彰德府。派鐵良袁世凱爲閱兵大臣。

乙卯。宣示釐定官制。內閣軍機處外務部吏部學部均如舊。巡警部改爲民政部。戶部改爲度支部。以財政處稅務處併入。太常光祿鴻臚三寺併入禮部。兵部改

爲陸軍部。以練兵處太僕寺併入。商部改爲農工商部。另設郵傳部。理藩院改爲理藩部。各部除外務部外。均設尙書一員。侍郎二員。不分滿漢。都察院改爲都御史一員。副都御史二員。改大理寺爲大理院。

命編訂直省官制。

以鹿傳霖爲吏部尙書。溥頌爲度支部尙書。溥良爲吏部尙書。鐵良爲陸軍部尙書。戴鴻慈爲法部尙書。張百熙爲郵傳部尙書。壽耆爲理藩部尙書。其民政部尙書徐世昌、學部尙書榮慶、農工商部尙書載振。均不更換。

命鹿傳霖榮慶徐世昌鐵良均開去軍機大臣。專管部務。

命奕劻瞿鴻禨仍爲軍機大臣。世續補授軍機大臣。林紹年在軍機大臣上學習行走。

改政務處爲會議政務處。

丁巳。日本歸吾營口。

十月戊寅。頒行禁煙章程十條。

江西萍鄉會黨起事。官軍勦平之。革命黨先舉事於湖南之瀏陽。萍鄉鑛工應之。旋爲官軍所敗。

袁世凱請開去各項兼差。以第三第五第六鎮陸軍歸陸軍部直轄。允之。改軍機處章京爲實官。

十一月戊申。升孔子爲大祀。

裁廣東陸路提督缺。歸併水師。

十二月設京師內外城總廳。以榮勳朱啟鈴爲廳丞。

以鳳山總統一三五六四鎮新軍訓練。

光緒三十三年丁未。正月辛亥。調岑春煊爲四川總督。錫良爲雲貴總督。

壬子。丁振鐸開缺。以松壽爲閩浙總督。

二月己卯。張百熙卒。予謚文達。

三月己亥。改盛京將軍爲東三省總督。兼管三省將軍事務。奉天吉林黑龍江各設巡撫。以徐世昌爲東三省總督。並授爲欽差大臣。唐紹儀爲奉天巡撫。朱家寶署吉林巡撫。段芝貴署黑龍江巡撫。

庚子。以那桐兼署民政部尙書。

壬子。以岑春煊爲郵傳部尙書。趙爾巽爲四川總督。

命奕劻管理陸軍部事務。

丙辰。以程德全署理黑龍江巡撫。

丁巳。致仕大學士崑岡卒。予諡文達。

四月乙丑。御史趙啟霖以奏參疆臣賁緣親貴革職。初奕劻之子貝子銜鎮國將軍尙書載振至東三省查事。還過天津。段芝貴購歌妓楊翠喜以獻。及芝貴署黑龍江巡撫。啟霖據以糾參。派載灃孫家鼐確查。至是。據稱查明楊翠喜實爲商人王益孫買作使女。遂以污蔑親貴重臣名節。奪啟霖職。時芝貴已命毋庸署理巡

撫。載振旋亦奏請開去各項差使。優詔許之。至六月。復啟霖職。

丁卯。以溥頤爲農工商部尙書。載澤爲度支部尙書。

丁丑。周馥開缺。以岑春煊爲兩廣總督。春煊甫任郵傳部。卽劾罷侍郎朱寶奎。奕劻等以爲不便。適廣東欽廉及饒平會黨起事。遂借此出之。春煊奏辭。不許。

以陳璧爲郵傳部尙書。

五月丁酉。命瞿鴻禨開缺回籍。鴻禨在軍機處。與奕劻不協。學士惲毓鼎參鴻禨。暗通報館。授意言官。陰結外援。分布黨羽。奏入。命孫家鼐鐵良查明具奏。又詔姑免深究。著開缺回籍。

戊戌。以呂海寰爲外務部尙書。善耆爲民政部尙書。

己亥。命載灃在軍機大臣上學習行走。鹿傳霖爲軍機大臣。陸潤庠爲吏部尙書。奕劻請開去軍機大臣要差。溫諭慰留。

辛丑。大學士王文韶因病乞休。允之。

清史紀事 卷一百一十四
以張之洞協辦大學士。

致仕大學士崇禮卒。予諡文恪。

丁巳。改各省按察使爲提法使。增設巡警勸業道。裁撤分巡分守各道。分設審判廳。增易佐治員。命由東三省先行開辦。直隸江蘇兩省亦擇地先爲試辦。其餘各省。分年分地。請旨辦理。統限十五年一律通行。

己未。安徽巡撫恩銘爲道員徐錫麟槍斃。錫麟及其黨陳伯平等。均爲官兵所殺。錫麟。浙江紹興人。與同志設光復會。共謀革命。至是。在皖舉事不克。其黨秋瑾等。在紹興謀起事。亦爲浙吏所殺。

六月辛酉。設禮學館。

壬戌。命嗣後各衙門引見人員。暫歸內閣驗放。

設軍諮府。以馮國璋爲正使。

癸酉。以張之洞爲大學士。仍留湖廣總督任。以鹿傳霖協辦大學士。

七月辛卯。命內外各衙門妥議化除滿漢畛域。

以林紹年爲河南巡撫。

癸巳。岑春煊開缺。以張人駿爲兩廣總督。春煊至滬。稱病請假。至是。將赴任。特旨命開缺。

致仕大學士敬信卒。予諡文恪。

甲午。改考察政治館爲憲政編查館。歸併會議政務處於內閣。

壬寅。派楊士琦往南洋各埠考察華僑。

丙辰。以袁世凱爲外務部尙書。呂海寰爲會辦稅務大臣。

以張之洞袁世凱爲軍機大臣。

調趙爾巽爲湖廣總督。陳夔龍爲四川總督。以楊士驥署直隸總督。

八月辛酉。命汪大燮于式枚達壽分赴英德日本國考察憲政。

辛未。命提督夏辛酉率所部往長江一帶扼要屯紮。

命各省籌畫駐防旗丁生計。

壬申。派溥倫孫家鼐爲資政院總裁。

九月辛卯。命禮部及修訂法律大臣議定滿漢通行禮制刑律。

癸巳。派沈家本俞廉三英瑞充修訂法律大臣。

辛丑。命中外大臣薦舉人才。

命各省速設諮議局。

壬寅。命外務部派員與英人商訂蘇杭甬借款造路章程。

甲辰。命各省設立調查局。各部院設立統計處。

十月乙丑。命孫家鼐等輪班進講經史及國朝掌故。

十一月。廣西鎮南關右輔山礮臺失守。孫文黃興等由越南進攻鎮南關。奪礮臺

三座。旋爲官軍擊退。孫文。廣東香山人。始入興中會。潛謀革命。乙未十月。謀起事

於廣州。事洩。遁海外。會員陸皓東等死之。旋至倫敦。爲駐英公使龔照瑗所捕。因

英政府干涉。乃得釋放。黃興、湖南、長沙人。與陳天華、宋教仁等創華興會。庚子十月。謀舉事於長沙。事洩。走日本。尋孫文至日本。乃與黃興等合創同盟會。密購軍火。糾合會黨。思於閩、廣、雲南起事。至是。攻鎮南關。以軍火不繼而敗。復設廣東水陸兩提督缺。

諭禁學生干預政治。

諭禁京師開會演說等事。

十二月丁卯。命提督姜桂題統兵馳赴浙江。辦理勦撫梟匪事宜。時蘇浙兩省紳民力爭鐵路商辦。適蘇浙交界有梟匪滋擾。朝命桂題率兵南下。以資鎮懾。旋報梟匪解散。姜軍不果行。

甲戌。命景星、俞廉三、丁振鐸、曹鴻勛、陸元鼎協理開辦資政院事務。旋又命寶熙、沈雲沛爲幫辦。

乙亥。派呂海寰充督辦津浦鐵路大臣。那桐充督辦稅務大臣。

清史綱要 卷十四
辛巳。派江蘇布政使瑞澂督辦蘇松太杭嘉湖緝捕清鄉事宜。

光緒三十四年戊申。正月。廣東緝獲日本輪船二。辰丸私運軍火。日人抗議。旋以賠款服禮結案。

二月庚申。調趙爾巽爲四川總督。陳夔龍爲湖廣總督。

賞趙爾豐尙書銜。作爲駐藏辦事大臣。仍兼邊務大臣。

外務部郵傳部奏請與英國公司議訂滬杭甬鐵路合同二十四條簽押。允之。

三月壬辰。派溥偉鹿傳霖景星丁振鐸充辦理禁煙大臣。

四月丙辰。綏遠城將軍貽穀以放墾蒙地浮收漁利濫殺台吉丹丕爾一家五命。逮問。

甲子。頒行違警律。

雲南河口南溪等處失守。革命黨在雲南河口邊界起事。遂佔礮臺。黃興自越南海防至河口。分兵攻蠻耗開化蒙自等處。旋爲官軍所敗。所失各地均收復。

五月。加恩咸豐同治以來功臣子孫有差。

六月丙子。因美國減收賠款。派唐紹儀充專使。前往致謝。

戊寅。頒行諮議局章程及議員選舉章程。

七月庚子。查禁政聞社。

八月甲寅。奕劻等奏進憲法大綱。暨議院法選舉法要領。及議院未開以前逐年應行籌備事宜。命刊刻謄黃。分發在京各衙門。在外各督撫府尹司道。懸掛堂上。責成依限舉辦。每屆六箇月。將籌辦成績。臚列奏聞。

癸酉。馬玉崑卒。以姜桂題接充武衛左軍總統。

己卯。因江南湖北陸軍在安徽太湖地方秋操。命蔭昌端方爲閱兵大臣。

九月。派毓朗梁敦彥往廈門勞問美國海軍。

丙申。郵傳部借匯豐匯理兩銀行英金五百萬鎊。爲贖京漢鐵路之用。命郵傳部堂官畫押。

壬寅。達賴喇嘛來朝。達賴避英兵至庫倫。還至西寧。至是來朝。

十月壬戌。加封達賴喇嘛爲誠順贊化西天大善自在佛。

壬申。授醇親王載灃爲攝政王。

命載灃之子溥儀在宮內教養。並在上書房讀書。

癸酉。西刻。帝崩。遺詔以載灃之子溥儀入承大統。爲嗣皇帝。太后命以溥儀承繼穆宗爲嗣。兼承大行皇帝之祧。

以攝政王爲監國。

尊皇太后爲太皇太后。兼祧母后爲皇太后。

甲戌。未刻。太皇太后赫葉那拉氏崩。諡曰孝欽獻皇后。

戊寅。安徽馬礮營兵變。駐安慶馬礮營隊官熊成基乘秋操起事。城中嚴守。不得入。又爲兵艦所攻。遂率衆向西北桐城樅陽等處退走。衆漸潰散。成基後於哈爾賓被捕。死於吉林。

十一月辛卯。嗣皇帝卽位。以明年爲宣統元年。

丁酉。上大行皇帝尊諡曰同天崇運大中至正經文緯武仁孝睿智端儉寬勤景皇帝。廟號德宗。陵曰崇陵。

壬寅。頒行監國攝政王禮節。

丙午。設立變通旗制處。派溥倫載澤等專司其事。

丁未。上皇太后徽號曰隆裕皇太后。

戊申。命奕劻以親王世襲罔替。並加恩王公大臣等有差。

定諭旨由軍機大臣署名之制。

十月甲寅。命載濤毓朗鐵良充專司訓練禁衛軍大臣。時另編禁衛軍。由攝政親統。而派載濤等司訓練。

庚申。致仕大學士王文韶卒。贈太保。予諡文勤。

辛酉。收還京漢鐵路。

頒布調查戶口章程。

壬戌。命袁世凱開缺回籍養病。

命那桐在軍機大臣上學習行走。

癸亥。以梁敦彥署理外務部尚書。

辛未。頒布清理財政章程。

戊寅。頒布城鎮鄉地方自治章程。

宣統元年己酉。正月丁酉。郵傳部尚書陳璧以用款糜費調員冒濫革職。

庚子。以徐世昌為郵傳部尚書。錫良為東三省總督。李經羲為雲貴總督。

庚戌。派善耆載澤鐵良薩鎮冰籌備海軍。鐵良開去訓練禁衛軍差使。

二月乙丑。降諭宣示朝廷一定實行預備立憲。

甲戌。申諭禁煙辦法。

庚辰。頒行清理財政處各項章程。

閏二月甲申。定嗣後丁憂人員。無論滿漢。一律離任守制。

三月丙辰。各國派送德宗景皇帝梓宮專使覲見。

辛酉。德宗景皇帝梓宮奉移山陵。

己巳。予立山徐用儀許景澄聯元袁昶諡。

四月庚辰。命載振往日本。戴鴻慈往俄國。答謝派遣專使來送梓宮。

甲申。命各省財政統歸藩司或度支司綜核。其餘一切局所。予限一年。次第裁撤。

五月甲寅。升允以奏阻立憲開缺。以長庚爲陝甘總督。

己未。楊士驥卒。以端方調補直隸總督。未到任前。以那桐署理。

調張人駿爲兩江總督。以袁樹勛署兩廣總督。

戊辰。開復前協辦大學士翁同龢原官。

丙子。諭以欽遵遺訓。皇帝自爲海陸軍大元帥。未親政以前。暫由攝政王代理。並先行專設軍諮處。以毓朗管理。尋又添派載濤管理。

命載洵薩鎮冰充籌辦海軍大臣。

六月甲申。奕劻請開去管理陸軍部事務差使。允之。

甲午。呂海寰以失察津浦路局員李德順營私。開去督辦津浦鐵路大臣差使。以徐世昌代之。並派沈雲沛幫辦。

丙午。以薩鎮冰爲海軍提督。

七月乙卯。頒行資政院章程。

丙辰。派張人駿爲南洋勸業會會長。

遣載洵薩鎮冰巡視沿江沿海各省武備。旋又至歐洲各國考察海軍。

丁卯。與日本訂立東三省交涉五案條款成。日本因安奉鐵路改築事。自由行動。交涉幾至決裂。至是。并其他諸案及吉長借款契約。訂立條款完案。

八月己亥。大學士張之洞卒。贈太保。予諡文襄。

命戴鴻慈在軍機大臣上學習行走。以廷杰爲法部尙書。

庚子。以溥良爲察哈爾都統。葛寶華爲禮部尙書。

丙午。以九月初一日各省諮議局開議。降諭誥誠議員及各督撫。

九月丙寅。以鹿傳霖爲大學士。陸潤庠協辦大學士。

十月丁亥。直隸總督端方以恣意任性不知大體革職。端方因恭送梓宮。令人在隆裕皇太后行宮外攝影。爲人參奏。下部議革職。

調陳夔龍爲直隸總督。以瑞澂爲湖廣總督。

甲午。大學士孫家鼐卒。贈太傅。予諡文正。

十一月壬子。以玩誤要政。革甘肅布政使毛慶蕃職。

乙丑。以載澤爲督辦鹽政大臣。

丙寅。以陸潤庠爲大學士。戴鴻慈協辦大學士。李殿林爲吏部尙書。

十二月己卯。諭誠建言諸臣。不得懷挾私見。及毛舉細故。不知大體。

壬午。賞給游學專門詹天佑嚴復等進士舉人有差。

清史綱要 卷十四
乙未。直隸各省諮議局議員孫洪伊等請速開國會。諭俟將來九年預備業已完。全國民教育普及。屆時必毅然降旨。定期召集議院。

頒行禁煙條例。

壬寅。頒行府廳州縣地方自治章程。

癸卯。頒行法院編制法。

宣統二年庚戌。正月戊申。廣東新軍。因與巡警交關起釁。革命黨乘機起事。爲防軍擊斃數百人。餘衆潰散。

辛酉。革阿旺羅布藏吐布丹甲錯濟寨汪曲却勒朗結達賴喇嘛名號。時川兵至西藏拉薩。達賴喇嘛遁入印度。故黜其封號。

御史江春霖以奏參奕劻。斥爲莠言亂政。命回原衙門行走。

癸亥。戴鴻慈卒。予諡文誠。以徐世昌協辦大學士。

命吳郁生在軍機大臣上學習行走。

甲戌。定嗣後內外文武滿漢諸臣陳奏事件。一律稱臣。

二月辛巳。鐵良因病乞休。允之。以廕昌爲陸軍部尙書。

丙申。葛寶華卒。調榮慶爲禮部尙書。以唐景崇爲學部尙書。

山西交城文水兩縣人民因禁煙暴動。爲官兵勦平。

丁酉。汪兆銘等謀刺攝政王。事洩。被獲。命永遠監禁。

三月戊申。湖南省城饑民暴動。焚毀巡撫衙門及教堂學堂。

癸亥。裁奉天巡撫缺。

四月庚辰。頒行現行刑律。

甲申。以督辦鹽政大臣與各督撫互爭權限。均傳旨申飭。

己丑。頒行幣制則例。中國國幣單位。定名曰圓。暫就銀爲本位。以一圓爲主幣。重庫平七錢二分。另以五角二角五分一角三種銀幣。及五分鎊幣。二分一分五釐一釐四種銅幣。爲輔幣。圓角分釐。各以十進。永爲定價。

五月癸亥。諮議局議員孫洪伊等並各省旗籍各代表。請速開國會。諭仍俟九年籌備完全。再行降旨定期召集議院。

山東萊陽海陽縣人民因抵抗苛稅暴動。爲官兵殺傷數百人。

六月庚寅。命籌辦海軍事務大臣載洵充參預政務大臣。載洵考察歐洲各國海軍。於上年冬還京。是月。又往日本美國考察。

壬辰。梁敦彥因病乞休。允之。以鄒嘉來爲外務部尙書。

丁酉。諭飭各督撫慎選牧令。

戊戌。諭飭各部院堂官各省督撫。嚴治貪官污吏。並飭貴戚及內外大臣。敦品勵行。整躬率屬。

七月甲寅。命世續開去軍機大臣。吳郁生毋庸在軍機大臣上學習行走。以毓朗徐世昌爲軍機大臣。

以唐紹怡署郵傳部尙書。

庚申。革開缺江西提學使浙路總理湯壽潛職。不准干預路事。壽潛電軍機處。詆郵傳部侍郎盛宣懷。政府以爲措詞荒謬。予嚴譴。

甲子。大學士鹿傳霖卒。贈太保。予諡文端。

乙丑。設各省交涉使。

八月乙亥。以鐵良爲江寧將軍。

癸未。命沈家本充資政院副總裁。

己丑。命蔭昌兼充訓練近畿各鎮大臣。以鳳山爲荊州將軍。

辛卯。召集資政院議員。

甲午。命近畿陸軍均歸陸軍部直接管轄。裁撤近畿督練公所。

改四川鹽茶道爲鹽運使。並設奉天鹽運使。

乙未。以吉林等省清除種煙未淨。該督撫均交部議處。

丙申。以徐世昌爲大學士。李殿林協辦大學士。

清史綱要 卷一百一十四
戊戌。以營私罔利居心狡詐。革江海關道蔡乃煌職。

九月辛丑。資政院開院。監國攝政王臨院宣布訓詞。

甲辰。四川定鄉兵變。竄陷雲南中甸。旋被官軍勦平。

丙寅。袁樹勛因病乞休。允之。以張鳴岐署兩廣總督。

十月癸酉。因各省督撫及資政院奏請欽頒憲法。組織內閣。速開國會。命縮改於宣統五年實行開設議院。並先將官制釐訂。預卽組織內閣。編訂憲法。並命各省代表卽日散歸。

甲戌。派溥倫載澤充纂擬憲法大臣。

己卯。以程允和爲長江水師提督。並命雲南提督張勳接統駐紮江南浦口各營。十一月癸卯。改籌辦海軍處爲海軍部。以載洵爲海軍大臣。譚學衡爲副大臣。

裁撤陸軍部尙書侍郎等缺。設陸軍大臣副大臣各一員。以廢昌爲陸軍大臣。壽

勳爲副大臣。

乙巳。派薩鎮冰統制巡洋長江艦隊。

丁巳。奕劻奏請開去軍機大臣要差。不許。同日資政院奏劾軍機大臣。命毋庸議。
癸亥。命民政部步軍統領衙門將東三省要求速開國會代表。送回原籍。並命各督撫開導彈壓。如有違抗。查拏嚴辦。

乙丑。奕劻奏懇開去軍機大臣等差。溫諭慰留。

十二月丙子。唐紹怡因病乞休。允之。以盛宣懷爲郵傳部尙書。

雲南大姚縣人民暴動。縣城失守。旋爲官軍勦平。

辛巳。資政院閉會。

癸未。派錫良陳夔龍張人駿瑞澂李經羲參訂外省官制。

乙未。頒布新刑律暨暫行章程。

派載振爲賀英君加冕專使。

戊戌。頒布宣統三年預算案。並命如實有窒礙難行之處。准由京外各衙門徑行

具奏。候旨辦理。

廷杰卒。以紹昌爲法部尙書。

宣統三年辛亥。正月乙巳。因英兵佔踞片馬。命駐英大臣請英政府撤兵。中英滇緬界務。久未解決。上年秋間。英派兵駐片馬。雲貫總督及雲南紳民屢請力爭。外務部命駐英使臣劉玉麟速與英政府交涉。

辛酉。因東三省鼠疫流行。命設法消弭。

乙丑。申諭各省停止刑訊。

二月乙亥。四川德格春科高日三土司改流。設邊北道登科府等官。並改巴塘打箭鑪爲巴安康定二府。設康安道。

丙戌。裁撤駐藏幫辦大臣。改設左右參贊。

辛卯。以溥倫爲農工商部尙書。溥頤爲熱河都統。

以世續充資政院總裁。李家駒充副總裁。世續奏辭。不許。

以劉若曾充修訂法律大臣。

癸巳。郵傳部尙書盛宣懷奏借日本正金銀行款一千萬元。訂立合同。

三月癸卯。頒全國軍隊訓諭六條。

戊申。署廣州將軍孚琦被刺。孚琦至城外觀飛艇。爲溫生才槍斃。

甲寅。實授張鳴岐兩廣總督。

乙卯。度支部尙書載澤奏借英美德法四國銀行款一千萬鎊合同簽押。

庚申。錫良因病乞休。允之。調趙爾巽爲東三省總督。

辛酉。以趙爾豐署四川總督。王人文充督辦川滇邊務大臣。

丁卯。黃興等起事於廣州。燬總督衙門。被官軍擊退。死者七十二人。興走還香港。

四月癸酉。江蘇諮議局與兩江總督張人駿爭預算案。全體議員辭職。

甲戌。宣布因改定幣制振興實業。借英美德法四國及日本銀行款。並命該管衙門竭力慎節。不得移作別用。

戊寅。頒布內閣官制。設立內閣。以奕劻爲總理大臣。那桐徐世昌爲協理大臣。梁敦彥爲外務大臣。善耆爲民政大臣。載澤爲度支大臣。唐景崇爲學務大臣。蔭昌爲陸軍大臣。載洵爲海軍大臣。紹昌爲司法大臣。溥倫爲農工商大臣。盛宣懷爲郵傳大臣。壽耆爲理藩大臣。均爲國務大臣。

裁撤內閣軍機處會議政務處。舊設內閣大學士協辦大學士。仍序次於翰林院。設立弼德院。以陸潤庠爲院長。榮慶爲副院長。

設立軍諮府。以載濤毓朗爲軍諮大臣。

添派趙爾巽會同商訂外省官制。

己卯。因外務部與英使續訂禁煙條件。飭各省督撫迅將禁種禁吸禁運各事認真整頓。

宣示鐵路政策。幹路均歸國有。枝路准商民量力酌行。從前批准鐵路各案。一律取銷。如有抵抗。卽照違制論。

庚辰。召集資政院第二次常會。

丁亥。資政院奏請開臨時會議。決借款預算兩事。不許。

戊子。以端方充督辦粵漢川漢鐵路大臣。

以本年秋季調集禁衛軍及近畿各鎮陸軍在永平府大操。派馮國璋充東軍總統官。舒清阿充西軍總統官。

壬辰。命停止四川湖南兩省鐵路租股。旋又允湖南京官奏請。停止因路抽收之米鹽捐及房捐。

五月辛丑。湖南巡撫楊文鼎代諮議局奏稱湘路力能自辦。不甘借債。奉旨嚴行申飭。

癸卯。署四川總督王人文代諮議局奏稱鐵路改爲國有。請飭暫緩接收。奉旨嚴行申飭。

戊午。宣布川粵漢鐵路收回詳細辦法。

甲子。頒布內閣屬官制暨內閣法制院官制。裁撤憲政編查館吏部等衙門。
六月丁卯。改訂資政院院章。旋即改定頒行。

丙子。都察院代奏直省諮議局議員請另行組織內閣。不許。時人民以皇族組織內閣。不合君主立憲公例。由諮議局議員呈請都察院代奏。奉旨以黜陟百司。係君上大權。議員不得干預。不許。

辛巳。皇太后因皇帝七月內在毓慶宮入學讀書。派陸潤庠陳寶琛授讀。並派伊克坦教習國語清文。

以榮慶充弼德院院長。鄒嘉來充副院長。

辛卯。以禮部改設典禮院。以李殿林爲掌院學士。

閏六月己酉。頒行廣東禁賭條例。

壬子。因永平秋操。派載濤代臨。總監兩軍。

癸丑。命溥倫載澤會同宗人府纂擬皇室大典。

丁巳。調鳳山爲廣州將軍。以壽耆爲荊州將軍。

調善耆爲理藩大臣。以桂春署民政大臣。

廣東水師提督李準被刺受傷。傳旨慰問。

辛酉。命裁各省府治首縣。設立地方審判廳。

七月乙酉。命趙爾豐勦辦四川爭路人民。本月初。四川鐵路公司股東開保路大會。決議罷市。學堂亦停課。商民供德宗牌位舉哀。將軍玉崑總督趙爾豐等。聯名奏請川路暫歸商辦。政府不允。端方奏劾爾豐庸懦無能。朝旨命端方自湖北帶兵入川查辦。十五日。川人舉代表詣督署求阻端方兵。爾豐允爲代奏。旣而知朝意不欲轉圜。遂誘保路會會長鄧孝可、股東會會長顏楷、張瀾、及諮議局議長蒲殿俊、羅綸等。入署拘禁。人民相率至督署哀求釋放。統領田徵葵命官兵開槍。擊斃多人。及電奏至京。朝廷命爾豐嚴飭新舊各軍。相機勦辦。時近省各縣民團多爲官兵焚殺。死者甚衆。

清史綱要 卷十四
戊子。命岑春煊前往四川。會同趙爾豐辦理勦撫事宜。春煊至武昌。與瑞澂議不合。稱病乞歸。會趙爾豐奏勦辦得手。朝旨許春煊還上海。

己丑。攝政王校閱禁衛軍。

八月丙申。總稅務司英人赫德卒。贈太子太保銜。

壬寅。奕劻奏請開去差缺。溫諭慰留。

庚戌。改鹽政處爲鹽政院。以載澤兼任鹽政院大臣。

癸丑。以接收湖北境內粵漢川漢鐵路。辦理迅速。瑞澂等傳旨嘉獎。

武昌民軍起。推第二十一混成協統黎元洪爲都督。瑞澂遁。武昌漢陽及漢口鎮俱爲民軍所佔領。初。革命黨定期十八夜起事。先爲總督瑞澂統制張彪等偵知。捕獲數十人。十八夜。斬劉汝夔。楊宏勝。彭楚藩三人於督署前。電奏到京。朝旨嘉獎。十九夜。工程營起事。先奪楚望台軍械局。輜重營縱火攻督署。瑞澂倉皇登

楚豫兵輪。張彪亦棄營遁。民軍遂佔武昌。分兵下漢陽漢口及兵工廠。推黎元洪

爲都督。二十一日。朝命廕昌督兵兩鎮前往湖北。薩鎮冰督兵艦程允和督長江水師赴援。革瑞澂張彪職。仍令瑞澂署總督。帶罪圖功。並停止秋操。又命各省緩裁綠營巡防隊。

丁巳。以袁世凱爲湖廣總督。岑春煊爲四川總督。均督辦勦撫事宜。

戊午。撤去王人文川滇邊務大臣。以趙爾豐代之。又以端方署四川總督。

九月乙丑。資政院開院。派世鐸代臨。行開院禮。

湖南長沙民軍起。推焦昱爲都督。陳作新爲副都督。防營統領總兵黃忠浩死之。

丙寅。江西九江民軍起。推標統馬毓寶爲都督。

丁卯。陝西西安民軍起。推張鳳翽爲都督。

戊辰。廣州將軍鳳山被刺。鳳山到粵。甫登岸。至大南門外。爲炸彈轟斃。

己巳。以違法行私貽誤大局。革郵傳大臣盛宣懷職。以唐紹怡代之。

命趙爾豐釋放因爭路被捕士紳。並將王人文趙爾豐交內閣議處。道員田徵葵

等革職遣戍有差。

貴州貴陽民軍起。推楊柏舟爲都督。

庚午。授袁世凱欽差大臣。節制各軍。以馮國璋總統第一軍。段祺瑞總統第二軍。召廕昌回京。

辛未。湖北民軍退出漢口。

壬申。山西太原民軍起。推協統閻錫山爲都督。巡撫陸鍾琦闔家死之。瑞澂潛逃至上海。命張人駿派員拏解來京治罪。

癸酉。下詔罪己。

資政院奏請取消內閣暫行章程。不以親貴充國務大臣。允之。並允將憲法交資政院協贊。

諭開黨禁。

雲南省城民軍起。推蔡鍔爲都督。統制鍾麟同布政使世增死之。

世續因病請開資政院總裁缺。允之。以李家駒爲資政院總裁。達壽爲副總裁。以趙秉鈞署民政大臣。命桂春回倉場侍郎本任。

甲戌。江西南昌民軍起。推協統吳介璋爲都督。巡撫馮汝駉死之。

乙亥。以袁世凱爲內閣總理大臣。時奕劻載澤鄒嘉來等均自請罷斥。允之。命袁世凱組織內閣。以魏光燾爲湖廣總督。王士珍先行署理。

載濤罷。以廕昌爲軍諮大臣。

以奕劻爲弼德院院長。

長沙兵變。殺焦昱陳作新。推譚延闓爲都督。

丁丑。頒布憲法信條。擇期宣示太廟。先是。第二十鎮由奉天調赴前敵。至灤州。統制張紹曾與混成協統藍天蔚等。電奏要求實行立憲。並憲法由議院制定。奏入。政府大驚。卽命資政院起草憲法。是日。先行擬定憲法內重大信條十九條入奏。卽命頒布。刊刻謄黃。宣示天下。

戊寅。命統兵大員。剴切布告。宣布朝廷德意。安速安撫。俾皆曉然於朝廷實心與民更始。不忍再以兵力從事。又命各省統兵大員申明紀律。

庚辰。賞張紹曾侍郎銜。授爲宣撫大臣。赴長江一帶。宣布朝廷德意。

己卯。浙江杭州民軍起。推湯壽潛爲都督。

江蘇蘇州民軍起。推巡撫程德全爲都督。時江蘇之上海。亦先二日爲民軍佔領。推陳其美爲都督。

庚辰。署山西巡撫吳祿貞在石家莊被刺。祿貞任第六鎮統制。先與張紹曾等要求實行立憲。旋命署山西巡撫。是夜在石家莊被刺。

釋汪兆銘等。

辛巳。廣西桂林民軍起。推巡撫沈秉堃爲都督。

壬午。安徽安慶民軍起。推巡撫朱家寶爲都督。

癸未。廣東廣州民軍起。推胡漢民爲都督。

福建福州民軍起。推統制孫道仁爲都督。總督松壽將軍樸壽死之。任命袁世凱爲內閣總理大臣。資政院遵照憲法信條。選舉袁世凱爲總理大臣。故重行任命。

海軍各艦歸附民軍。

甲申。以世續爲總管內務府大臣。

乙酉。毓朗罷。以徐世昌爲軍諮大臣。旋又命充訓練禁衛軍大臣。

山東省城紳士奏請獨立。推巡撫孫寶琦爲都督。

蘇浙滬民軍會攻南京。推徐紹楨爲聯軍總司令。時南京民軍謀起事。爲兩江總督張人駿江南提督張勳所持。第九鎮與防軍開戰。挫於秣陵關。統制徐紹楨退至鎮江。蘇浙滬各派兵會之。

桂林兵變。改舉陸榮廷爲都督。

奉天省城設保安會。奉天紳民謀獨立。因軍界不贊成。乃改設保安會。推總督趙

清史紀要 卷一四
爾巽爲正會長。旋吉林黑龍江兩省亦設保安會。各推巡撫爲會長。

丙戌。江西改舉彭程萬爲都督。

丁亥。命近畿各鎮及各路軍隊。並姜桂題所部。均歸袁世凱節制調遣。

戊子。派張謇等爲各省宣慰使。

命每省選派代表三五人來京。共同會議。以定國是。

王士珍因病請開去署任。允之。以段芝貴護理湖廣總督。

己丑。安慶兵變。朱家寶出走。

庚寅。袁世凱組織內閣成。世凱既奉任命。屢辭不許。是日。入閣辦事。薦舉梁敦彥爲外務大臣。趙秉鈞爲民政大臣。嚴修爲度支大臣。唐景崇爲學務大臣。王士珍爲陸軍大臣。薩鎮冰爲海軍大臣。沈家本爲司法大臣。張謇爲農工商大臣。楊士琦署郵傳大臣。達壽爲理藩大臣。並以胡維德等爲各部次官。

辛卯。以段祺瑞署理湖廣總督。

以升允署理陝西巡撫。督辦陝西軍務。

十月辛丑。四川成都民軍起。推蒲殿俊爲都督。

官軍克復漢陽。時官軍與民軍疊有戰爭。至是。漢陽復爲官軍所得。民軍退守武昌。

壬寅。以克復漢陽功。賞馮國璋二等男爵。

端方至資州。爲軍士所殺。端方入川。聞湖北民軍起。謀北走陝西。所帶湖北軍士斬其首還鄂。

癸卯。各省民軍政府舉伍廷芳爲外交總長。

甲辰。各省民軍政府公推鄂軍政府爲中央軍政府。

山東取銷獨立。袁世凱派張廣建吳炳湘至濟南。命署布政使及巡警道。聯合陸軍統制吳鼎元等。取銷獨立。旋以廣建代孫寶琦爲巡撫。

乙巳。外蒙古庫倫宣告獨立。逐辦事大臣三多。

丙午。民軍攻取南京。張人駿等出走。

丁未。民軍推程德全改任江蘇都督。移駐南京。

河南巡撫寶棻開缺。以齊耀琳代之。以倪嗣冲爲河南布政使。幫辦軍務。尋又命兼署安徽布政使。

武漢南北兩軍議和。停戰三日。嗣又展期三日。

庚戌。監國攝政王載灃以醇親王退歸藩邸。

以世續徐世昌爲太保。

辛亥。命臣民自由剪髮。

壬子。袁世凱委任唐紹怡爲全權代表。與民軍議和。

以馮國璋爲察哈爾都統。

江西改舉馬毓寶爲都督。

四川成都兵變。改舉尹昌衡爲都督。

癸丑。以馮國璋充禁衛軍總統官。

以良弼爲軍諮使。

壬戌。唐紹怡與民軍議和代表伍廷芳等會議於上海英租界之市政廳。時又展停戰期十五日。嗣又展期七日。

山西巡撫張錫鑾帶兵至太原。時民軍山西都督閻錫山因兵單退駐平陽府。十一月丙寅。四川成都民軍殺前川督趙爾豐。

安徽舉孫毓筠爲都督。

戊辰。廣東舉副都督陳炯明代理都督。時孫文歸國過香港。胡漢民從之至上海。壬申。命開臨時國會。公決政體。時南北議和代表。因所主張政體不同情形。電達內閣。故降諭召集臨時國會。付之公決。而命內閣迅將選舉法妥議施行。

癸酉。各省民軍代表選舉孫文爲臨時大總統。時孫文甫自海外回國。十七省代表在南京投票公舉之。

清史紀事 卷一四
丙子。中華民國臨時大總統孫文在南京就任。改用陽曆。以是日爲民國元年元旦。

江蘇舉莊蘊寬代理都督。時程德全因病不能視事。故舉蘊寬代理。移駐蘇州。

丁丑。袁世凱撤銷唐紹怡議和代表。紹怡與伍廷芳等在上海議定國民會議召集方法。電達北京。袁世凱不允承認。唐辭職。允之。世凱致伍廷芳電。謂嗣後應商事件。直接電商。

戊寅。民國各省代表選舉黎元洪爲副總統。

民國臨時政府成立。黃興爲陸軍總長。黃鍾瑛爲海軍總長。伍廷芳爲司法總長。陳錦濤爲財政總長。王寵惠爲外交總長。程德全爲內務總長。蔡元培爲教育總長。張謇爲實業總長。湯壽潛爲交通總長。

壬午。伊犁民軍起。推前任將軍廣福爲都督。將軍志銳死之。

辛卯。袁世凱途遇炸彈。未傷。

十二月辛丑。錫封袁世凱一等侯爵。世凱固辭不受。

李家駒開缺。以許鼎霖充資政院總裁。

己酉。陳夔龍賞假。以張鎮芳署理直隸總督。

丁未。軍諮使良弼被刺。良弼爲民黨彭家珍炸折一足。越二日死。

授袁世凱全權。與民軍商酌遜位條件。時段祺瑞等。電請速定共和國體。隆裕皇太后諭。朝廷何忍以一姓之尊榮。貽萬民以實禍。惟是宗廟陵寢。以及皇室之優禮。皇族之安全。八旗之生計。蒙古回藏之待遇。均應預爲籌畫。故授世凱全權。與民軍研究一切辦法。

戊午。隆裕皇太后下詔。率皇帝將統治權公諸全國。清亡。袁世凱與民國議和代表。議定優待皇室八條。待遇皇族四條。待遇滿蒙回藏七條。隆裕皇太后屢召皇室會議。至是。決定下詔辭位。清自順治元年至宣統三年。凡二百六十八年。

清史綱要卷之十四終